

古文辭類纂

冊三



辭賦類四

古文辭類纂六十五

賈生惜誓

惜余年老而日衰兮。歲忽忽而不反。登蒼天而高舉兮。歷衆山而日遠。觀江河之紆曲兮。離四海之霑濡。攀北極而一息兮。吸沆瀣以充虛。飛朱鳥使先驅兮。駕太乙之象輿。蒼龍蚺虵於左驂兮。白虎騁而爲右騏。建日月以爲蓋兮。載玉女於後車。馳騫於杳冥之中兮。休息崑崙崑崙之墟。樂窮極而不厭兮。願從容乎神明。涉丹水而馳騁兮。右大夏之遺風。黃鵠之一舉兮。知山川之紆曲。再舉兮。睹天地之圓方。臨中國之衆人兮。託回飈乎尚羊。乃至少原之壑兮。赤松王喬皆在旁。二子擁瑟而調均兮。予因稱乎清商。澹然而自樂兮。吸衆氣而翹翔。念我長生而久僊兮。不如反予之故鄉。黃鵠後時而寄處兮。鷓鴣羣而制之。神龍

失水而陸居兮。爲螻蟻之所裁。夫黃鵠神龍猶如此兮。況賢者之逢亂世哉。壽冉冉而日衰兮。固儻回而不息。俗流從而不止兮。衆枉聚而矯直。或偷合而苟進兮。或隱居而深藏。苦稱量之不審兮。同權概而就衡。或推迯而苟容兮。或直言之諤諤。傷誠是之不察兮。并紉茅絲以爲索。方世俗之幽昏兮。眩白黑之美惡。放山淵之龜玉兮。相與貴夫礫石。梅伯數諫而至醢兮。來革順志而用國。悲仁人之盡節兮。反爲小人之所賊。比干忠諫而剖心兮。箕子被髮而佯狂。水背流而源竭兮。木去根而不長。非重軀以慮難兮。惜傷身之無功。已矣哉。獨不見夫鸞鳳之高翔兮。乃集大皇之壑。循四極而回周兮。見盛德而後下。彼聖人之神德兮。遠濁世而自藏。使麒麟可得羈而係兮。又何以異乎犬羊。

賈生鵬鳥賦

有序○○○

始自賈全卷空而後論

誼爲長沙王傅三年有鵬鳥飛入誼舍止于坐隅鵬似鷄不祥鳥也誼旣以謫居長沙長沙卑溼誼自傷悼以爲壽不得長乃爲賦以自廣其辭曰

單闕之歲兮四月孟夏庚子曰斜兮鵬集予舍止於坐隅兮貌甚閒暇異物來萃兮私怪其故發書占之兮讖言其度曰野鳥入室主人將去請問子鵬予去何之吉乎告我凶言其災淹速之度兮語余其期鵬乃歎息舉首奮翼口不能言請對以臆回萬物變化兮固無休息斡流而遷兮或推而還形氣轉續兮變化而蟺物穆無窮兮胡可勝言禍兮福所倚福兮禍所伏憂喜聚門兮吉凶同域彼吳疆大兮夫差以敗越棲會稽兮句踐霸世斯遊遂成兮卒被五刑傅說胥靡兮乃相武丁夫禍之與福兮何異糾纏命不可

說兮孰知其極。水激則旱兮。矢激則遠。萬物回薄兮。
振盪相轉。雲蒸雨降兮。糾錯相紛。大鈞播物兮。塊
無垠。天不可預慮兮。道不可預謀。遲速有命兮。焉識
其時。且夫天地爲鑪兮。造化爲工。陰陽爲炭兮。萬物
爲銅。合散消息兮。安有常則。千變萬化兮。未始有極。
忽然爲人兮。何足控搏。化爲異物兮。又何足患。小智
自私兮。賤彼貴我。達人大觀兮。物無不可。貪夫徇財
兮。烈士徇名。夸者死權兮。品庶每生。怵迫之徒兮。或
趨西東。大人不曲兮。意變齊同。愚士繫俗兮。窘若囚
拘。至人遺物兮。獨與道俱。衆人惑惑兮。好惡積億。真
人恬漠兮。獨與道息。釋智遺形兮。超然自喪。寥廓忽
荒兮。與道翱翔。乘流則逝兮。得坻則止。縱軀委命兮。
不私與己。其生兮若浮。其死兮若休。澹乎若深淵之
靜。泛乎若不繫之舟。不以生故自寶兮。養空而游。德

人無累兮。知命不憂。細故蒂芥兮。何足以疑。

枚叔七發 ○ ○

楚太子有疾。而吳客往問之。曰。伏聞太子玉體不安。亦少閒乎。太子曰。憊。謹謝客。客因稱曰。今時天下安寧。四字和平。太子方富於年。意者久耽安樂。日夜無極。邪氣襲逆。中若結轡。紛屯澹淡。噓唏煩醒。惕惕怵怵。臥不得瞑。虛中重聽。惡聞人聲。精神越渫。百病咸生。聰明眩曜。悅怒不平。久執不廢。大命乃傾。太子豈有是乎。太子曰。謹謝客。賴君之力。時時有之。然未至於。是也。客曰。今夫貴人之子。必宮居而閨處。內有保母。外有傅父。欲交無所。飲食則溫淳甘臠。腥醲肥厚。衣裳則雜遘曼煖。燂爍熱暑。雖有金石之堅。猶將銷鑠而挺解也。況其在筋骨之閒乎哉。故曰縱耳目之欲。恣支體之安者。傷血脈之和。且夫出輿入輦。命曰

蹙痿之機。洞房清宮。命曰寒熱之媒。皓齒蛾眉。命曰伐性之斧。甘脆肥膿。命曰腐腸之藥。今太子膚色靡曼。四支委隨。筋骨挺解。血脈淫濯。手足情窳。越女侍前。齊姬奉後。往來遊讌。縱恣乎曲房。隱閒之中。此甘餐毒藥。戲猛獸之爪牙也。所從來者至深遠。淹滯永久而不廢。雖令扁鵲治內。巫咸治外。尚何及哉。今如太子之病者。獨宜世之君子。博見強識。承閒語事。變度易意。常無離側。以爲羽翼。淹沈之樂。浩唐之心。遁佚之志。其奚由至哉。太子曰。諾。病已。請事此言。客曰。今太子之病。可無藥石針刺灸療而已。可以要言妙道說而去也。不欲聞之乎。太子曰。僕願聞之。天下

客曰。龍門之桐。高百尺而無枝。中鬱結之輪菌。根扶疏以分離。上有千仞之峯。下臨百丈之谿。湍流遡波。又澹淡之。其根半死半生。冬則烈風漂霰。飛雪之所

激也。夏則雷霆霹靂之所感也。朝則鷓鴣黃鸝鳴焉。暮則羈雌迷鳥宿焉。獨鶻晨號乎其上。鷓鴣哀鳴翔乎其下。於是背秋涉冬。使琴摯斫斬以爲琴。野繭之絲以爲絃。孤子之鉤以爲隱。九寡之珥以爲約。使師堂操暢。伯子牙爲之歌。歌曰。麥秀漸兮雉朝飛。向虛壑兮背槁槐。依絕區兮臨迴溪。飛鳥聞之翕翼而不能去。野獸聞之垂耳而不能行。蚊蟻螻蟻聞之柱喙而不能前。此亦天下之至悲也。太子能強起聽之乎。太子曰。僕病未能也。

客曰。牻牛之腴。菜以筍蒲。肥狗之和。冒以山膚。楚苗之實。安胡之飯。搏之不解。一啜而散。於是使伊尹煎熬。易牙調和。熊蹯之臠。勺藥之醬。薄耆之炙。鮮鯉之膾。秋黃之蘇。白露之茹。蘭英之酒。酌以滌口。山梁之餐。豢豹之胎。小飯大歡。如湯沃雪。此亦天下之至美。

也。太子能強起嘗之乎。太子曰。僕病未能也。

客曰。鍾岱之牡。齒至之車。前似飛鳥。後類距虛。穉麥服處。躁中煩外。羈堅轡。附易路。於是伯樂相其前後。王良造父爲之御。秦缺樓季爲之右。此兩人者。馬佚能止之。車覆能起之。於是使射千鎰之重。爭千里之逐。此亦天下之至駿也。太子能強起乘之乎。太子曰。僕病未能也。

客曰。旣登景夷之臺。南望荆山。北望汝海。左江右湖。其樂無有。於是使博辯之士。原本山川。極命草木。比物屬事。離辭連類。浮游覽觀。乃下置酒於虞懷之宮。連廊四注。臺城層構。紛紜玄綠。輦道邪交。黃池紆曲。溷章白鷺。孔雀鸕鶿。鵝雛鳩鵲。翠鬣紫纓。螭龍德牧。邕邕羣鳴。陽魚騰躍。奮翼振鱗。淑溇萋萋。蔓草芳苓。女桑河柳。素葉紫莖。苗松豫章。條上造天。梧桐并欄。

極望成林。衆芳芬鬱。亂於五風。從容猗靡。消息陽陰。
列坐縱酒。蕩樂娛心。景春佐酒。杜連理音。滋味雜陳。
肴糅錯該。練色娛目。流聲悅耳。於是乃發激楚之結。
風揚鄭衛之皓樂。使先施徵舒。陽文段干吳娃閨。颯
傅予之徒。雜裾垂髻。目窈心與。揄流波。雜杜若。蒙清
塵。被蘭澤。熈服而御。此亦天下之靡麗。皓侈廣博之
樂也。太子能強起游乎。太子曰。僕病未能也。

客曰。將爲太子馴騏驎之馬。駕飛軫之輿。乘牡駿之
乘。右夏服之勁箭。左烏號之彫弓。游涉乎雲林。周馳
乎蘭澤。弭節乎江澗。揜青蘋。游清風。陶陽氣。蕩春心。
逐狡獸。集輕禽。於是極犬馬之才。困野獸之足。窮相
御之智巧。恐虎豹。懼鷲鳥。逐馬鳴鑣。魚跨麋角。履游
麇兔。蹈踐麋鹿。汗流沫墜。冤伏陵窘。無創而死者。固
足充後乘矣。此校獵之至壯也。太子能彊起游乎。太

子曰。僕病未能也。然陽氣見於眉宇之間。侵淫而上。幾滿大宅。客見太子有悅色也。遂推而進之。曰。冥火薄天。兵車雷運。旌旗偃蹇。羽旄肅紛。馳騁角逐。慕味爭先。徽墨廣博。望之有圻。純粹全犧。獻之公門。太子曰。善。願復聞之。客曰。未既。於是榛林深澤。煙雲闇莫。兕虎並作。毅武孔猛。袒裼身薄。白刃磴磴。矛戟交錯。收獲掌功。賞賜金帛。掩蘋肆若。爲牧人席。旨酒嘉肴。羞魚膾炙。以御賓客。涌觴並起。動心驚耳。誠必不悔。決絕以諾。貞信之色。形於金石。高歌陳唱。萬歲無斃。此真太子之所喜也。能彊起而游乎。太子曰。僕甚願從。直恐爲諸大夫累耳。然而有起色矣。

客曰。將以八月之望。與諸侯遠方交遊兄弟。並往觀濤乎。廣陵之曲江。至則未見濤之形也。徒觀水力之所到。則卹然足以駭矣。觀其所駕軼者。所擢拔者。所

揚汨者。所溫汾者。所滌汔者。雖有心略辭給。固未能
縷形其所由然也。况兮忽兮。聊兮慄兮。混汨汨兮。忽
兮慌兮。傲兮儻兮。浩瀆瀆兮。慌曠曠兮。秉意乎南山。
通望乎東海。虹洞兮蒼天。極慮乎崖涘。流攬無窮。歸
神日。母汨乘流而下降兮。或不知其所止。或紛紜其
流折兮。忽繆往而不來。臨朱汜而遠逝兮。中虛煩而
益怠。莫離散而發曙兮。鼎按暮離散者晚潮去也。發曙者早潮來也。內存

心而自持。於是澡概胸中。灑練五藏。澹澌手足。類濯
髮齒。揄棄恬怠。輸寫泆濁。分決狐疑。發皇耳目。當是
之時。雖有淹病滯疾。猶將伸偃起蹙。發瞽披聾而觀
望之也。况直眇小煩。遠醒醲病酒之徒哉。故曰發蒙
解惑。不足以言也。太子曰善。然則濤何氣哉。客曰。不
記也。然聞於師曰。似神而非者三。疾雷聞百里。江水
逆流。海水上潮。山出內雲。日夜不止。衍溢漂疾。波涌

而濤起。其始起也。洪淋淋焉。若白鷺之下翔。其少進也。浩浩澄澄。如素車白馬。帷蓋之張。其波涌而雲亂。擾擾焉。如三軍之騰裝。其旁作而奔起也。飄飄焉。如輕車之勒兵。六駕蛟龍。附從太白。純馳浩蜺。前後絡繹。顛顛卬卬。楛楛彊彊。莘莘將將。壁壘重堅。沓雜似軍行。旨隱匈磕。軋盤涌裔。原不可當。觀其兩旁。則滂渤怫鬱。閭漠感突。上擊下肆。有似勇壯之卒。突怒而無畏。蹈壁衝津。窮曲隨隈。踰岸出追。遇者死。當者壞。初發乎。或圍之津涯。亥軫公分。迴翔青篴。銜枚檀桓。弭節伍子之山。通厲肯母之場。凌赤岸。篲扶桑。橫奔似雷行。誠奮厥武。如振如怒。沌沌渾渾。狀如奔馬。混混沌沌。聲如雷鼓。發怒崖沓。清升踰趾。侯波奮振。合戰於藉藉之口。鳥不及飛。魚不及迴。獸不及走。紛紛翼翼。波涌雲亂。蕩取南山。背擊北岸。覆虧丘陵。平夷

西畔險險戲戲崩壞陂池。決勝乃罷。潑汨潺湲。披揚流灑。橫暴之極。魚鼈失勢。顛倒偃側。沈沈浹浹。蒲伏連延。神物怪疑。不可勝言。直使人踣焉。洄閼。悽愴焉。此天下怪異詭觀也。太子能彊起觀之乎。太子曰。僕病未能也。

客曰。將爲太子奏方術之士有資略者。若莊周魏牟。楊朱墨翟。便蜎詹何之倫。使之論天下之精微。理萬物之是非。孔老覽觀。孟子持籌而算之。萬不失一。此亦天下要言妙道也。太子豈欲聞之乎。於是太子據几而起曰。渙乎若一聽聖人辯士之言。忽然汗出。霍然病已。

漢武帝秋風辭 ○ ○ ○

秋風起兮白雲飛。草木黃落兮雁南歸。蘭有秀兮菊有芳。懷佳人兮不能忘。泛樓船兮濟汾河。橫中流兮

揚素波。簫鼓鳴兮發棹歌。歡樂極兮哀情多。少壯幾時兮奈老何。

漢武帝瓠子歌。○

瓠子決兮將奈何。浩浩洋洋。慮殫為河。殫為河兮。地不得寧。功無已時兮。吾山平。吾山平兮。鉅野溢。魚弗鬱兮。柏冬日。正道弛兮。離常流。蛟龍騁兮。放遠遊。歸舊川兮。神哉沛。不封禪兮。安知外。皇謂河伯兮。何不仁。泛濫不止兮。愁吾人。齧桑浮兮。淮泗滿。久不反兮。水維緩。

河湯湯兮激潺湲。北渡回兮迅流難。牽長茭兮湛美玉。河伯許兮薪不屬。薪不屬兮衛人罪。燒蕭條兮噫乎何。巨御水。隕林竹兮捷石菑。宣防塞兮萬福來。

淮南小山招隱士

王逸以為淮南小山之辭蓋藝文志所云淮南王羣臣賦也文

選直題為淮南王安作鼎疑昭明之世容有班固賈逵所解楚

詞或据異○○○
說題之

桂樹叢生兮山之幽。偃蹇連卷兮枝相繚。山氣曩崑
兮石嵯峨。谿谷蕝巖兮水曾波。援狢羣嘯兮虎豹嗥。
攀援桂枝兮聊淹留。王孫遊兮不歸。春草生兮萋萋。
歲莫兮不自聊。蟋蟀鳴兮啾啾。坎兮軋。山曲岬。心淹
留兮恫荒忽。罔兮沕。僚兮慄。虎豹岵。叢薄深林兮人
上慄。嶽崑碣礧兮硃磈礧。樹輪相糾兮林木茭翫。
青莎雜樹兮蘋草羅靡。白鹿麇慶兮或騰或倚。狀貌
蓋蓋兮峨峨。淒淒兮泔泔。獼猴兮熊羆。慕類兮以悲。
攀援桂枝兮聊淹留。虎豹鬪兮熊羆咆。禽獸駭兮亡
其曹。王孫兮歸來。山中兮不可以久留。

東方曼倩客難

客難東方朔曰。蘇秦張儀。一當萬乘之主。而都卿相
之位。澤及後世。今子大夫修先王之術。慕聖人之義。

諷誦詩書百家之言。不可勝記。著於竹帛。脣腐齒落。服膺而不釋。好學樂道之效。明白甚矣。自以智能海內無雙。則可謂博聞辯智矣。然悉力盡忠以事聖帝。曠日持久。官不過侍郎。位不過執戟。意者尚有遺行邪。同胞之徒。無所容居。其故何也。東方先生喟然長息。仰而應之曰。是固非子之所能備。彼一時也。此一時也。豈可同哉。夫蘇秦張儀之時。周室大壞。諸侯不朝。力政爭權。相禽以兵。并爲十二國。未有雌雄。得士者彊。失士者亡。故談說行焉。身處尊位。珍寶充內。外有廩倉。澤及後世。子孫長享。今則不然。聖帝流德。天下震懾。諸侯賓服。連四海之外。以爲帶。安於覆盂。天下平均。合爲一家。動發舉事。猶運之掌。賢不肖何以異哉。遵天之道。順地之理。物無不得其所。故綏之則安。動之則苦。尊之則爲將。卑之則爲虜。抗之則在青

雲之上。抑之。則在深淵。之下。用之。則爲虎。不用。則爲鼠。雖欲盡節效情。安知前後。夫天地之大。士民之衆。竭精談說。並進輻湊者。不可勝數。悉力募之。困於衣食。或失門戶。使蘇秦張儀與僕並生於今之世。曾不得掌故。安敢望園侍郎乎。傳曰。天下無害菑。雖有聖人。無所施才。上下和同。雖有賢者。無所立功。故曰。時異事異。雖然。安可以不務修身乎哉。詩曰。鼓鐘于宮。聲聞于外。鶴鳴于九臯。聲聞于天。苟能修身。何患不榮。太公體行仁義。七十有二。乃設用於文武。得信厥說。封於齊。七百歲而不絕。此士所以日夜孳孳。修學敏行。而不敢怠也。辟若鷺鷥。飛且鳴矣。傳曰。天不爲人之惡寒而輟其冬。地不爲人之惡險而輟其廣。君子不爲小人之匈匈而易其行。天有常度。地有常形。君子有常行。君子道其常。小人計其功。詩云。禮義之

不愆何恤人之言

上既云當修身矣而東方行事乃復言己之修

身乃在大德而不拘小節但求自得本心之安而已故世尤不能識之

故曰水至清則

無魚人至察則無徒冕而前旒所以蔽明黈纆充耳

所以塞聰明有所不見聰有所不聞舉大德赦小過

無求備於一人之義也枉而直之使自得之優而柔

之使自求之揆而度之使自索之蓋聖人之教化如

此欲其自得之自得之則敏且廣矣

何妃瞻云本望武帝知之不盡

反言明有所遺者君道固然

今世之處士魁然無徒廓然獨居上

觀許由下察接輿計同范蠡忠合子胥天下和平與

義相扶寡耦少徒固其宜也子何疑於予哉若夫燕

之用樂毅秦之任李斯酈食其之下齊說行如流曲

從如環所欲必得功若丘山海內定國家安是遇其

時也子又何怪之邪語曰以筦闚天以蠡測海以莛

撞鐘豈能通其條貫考其文理發其音聲哉繇是觀

之。譬猶鼯鼯之襲狗，狐豚之咋虎。至則靡耳，何功之有。今以下愚而非處士，雖欲勿困，固不得已。此適足以明其不知權變，而終惑於大道也。薑塢先生云：瑰邁宏放之氣如

齋雲而

上馳東方曼倩非有先生論。○不笑對曰：德而容，長

非有先生仕於吳，進不稱往古以厲主意，退不能揚君美以顯其功。默然無言者三年矣。吳王怪而問之曰：寡人獲先人之功，寄於衆賢之上，夙興夜寐，未嘗敢怠也。今先生率然高舉，遠集吳地，將以輔治寡人，誠竊嘉之。體不安席，食不甘味，目不視靡曼之色，耳不聽鐘鼓之音，虚心定志，欲聞流議者，三年於茲矣。今先生進無以輔治，退不揚主譽，竊不爲先生取之也。蓋懷能而不見，是不忠也；見而不行，主不明也。意者寡人殆不明乎？非有先生伏而唯唯。吳王曰：可以

談矣。寡人將竦意而覽焉。先生曰：於戲，可乎哉，可乎哉。談何容易。夫談有悖於目，拂於耳，謬於心，而便於身者，或有說於目，順於耳，快於心，而毀於行者，非有明王聖主，孰能聽之。吳王曰：何爲其然也。中人以上，可以語上也。先生試言。寡人將聽焉。先生對曰：昔者鬬龍逢深諫於桀，而王子比干直言於紂。此二臣者，皆極慮盡忠，閔主澤不下流，而萬民騷動，故直言其失，切諫其邪者，將以爲君之榮，除主之禍也。今則不然。反以爲誹謗君之行，無人臣之禮，果紛然傷於身，蒙不辜之名。戮及先人，爲天下笑。故曰：談何容易。是以輔弼之臣瓦解，而邪諂之人並進。及蜚廉惡來輩等，二人皆詐僞，巧言利口，以進其身。陰奉瑇瑁刻鏤之好，以納其心。務快耳目之欲，以苟容爲度。遂往不戒，身沒被戮。宗廟崩阨，國家爲虛。放戮聖賢，親近讒

夫詩不云乎。讒人罔極。交亂四國。此之謂也。故卑身
賤體。說色微辭。愉愉。訥訥。終無益於主上之治。則志
士仁人。不忍爲也。將儼然作矜嚴之色。深言直諫。上
以拂主之邪。下以損百姓之害。則忤於邪主之心。歷
於衰世之法。故養壽命之士。莫肯進也。遂居深山之
閒。積土爲室。編蓬爲戶。彈琴其中。以咏先王之風。亦
可以樂而忘死矣。是以伯夷。叔齊。避周。餓于首陽之
下。後世稱其仁。如是邪主之行。固足畏也。故曰。談何
容易。於是吳王懼然易容。捐薦去几。危坐而聽。先生
曰。接輿。避世。箕子。被髮佯狂。此二人者。皆避濁世以
全其身者也。使遇明王聖主。得清燕之閒。寬和之色。
發憤畢誠。圖畫安危。揆度得失。上以安主體。下以便
萬民。則五帝三王之道。可幾而見也。故伊尹。蒙恥辱。
負鼎俎。和五味。以干湯。太公。釣於渭之陽。以見文王。

心合意同。謀無不成。計無不從。誠得其君也。深念遠慮。引義以正其身。推恩以廣其下。本仁祖義。褒有德。祿賢能。誅惡亂。總遠方。一統類。美風俗。此帝王所由昌也。上不變天性。下不奪人倫。則天地和洽。遠方懷之。故號聖王。臣子之職。既加矣。於是裂地定封。爵爲公侯。傳國子孫。名顯後世。民到於今稱之。以遇湯與文王也。太公伊尹以如此。龍逢比干。獨如彼。豈不哀哉。故曰。談何容易。於是吳王穆然。俛而深惟。仰而泣下。交頤曰。嗟乎。余國之不亡也。縣縣連連。殆哉。世之不絕也。於是正明堂之朝。齊君臣之位。舉賢材。布德惠。施仁義。賞有功。躬節儉。減後宮之費。損車馬之用。放鄭聲。遠佞人。省庖廚。去侈靡。卑宮館。壞苑囿。填池塹。以予貧民。無產業者。開內藏。振貧窮。存耆老。卹孤獨。薄賦斂。省刑辟。行此三年。海內晏然。天下大治。隆

陽和調。萬物咸得其宜。國無災害之變。民無飢寒之色。家給人足。畜積有餘。囹圄空虛。鳳凰來集。麒麟在郊。甘露旣降。朱草萌芽。遠方異俗之人。鄉風慕義。各奉其職。而來朝賀。故治亂之道。存亡之端。若此易見。而君人者。莫肯爲也。臣愚竊以爲過。故詩云。王國克生。惟周之楨。濟濟多士。文王以寧。此之謂也。

古文辭類纂六十五

古文續漢書六十五

文正公公...

...

...

...

...

...

...

...

辭賦類五

古文辭類纂六十六

司馬長卿子虛賦 ○ ○ ○

楚使子虛使於齊。王悉發車騎。與使者出畋。畋罷。子虛過。奸烏有先生。亡是公存焉。坐定。烏有先生問曰。今日畋樂乎。子虛曰。樂。獲多乎。曰。少。然則何樂。對曰。僕樂齊王之欲夸僕。以車騎之衆。而僕對以雲夢之事也。曰。可得聞乎。子虛曰。可。王駕車千乘。選徒萬騎。畋於海濱。列卒滿澤。罟網彌山。掩兔麟鹿。射麋脚麟。鶩於鹽浦。割鮮染輪。射中獲多。矜而自功。顧謂僕曰。楚亦有平原廣澤。遊獵之地。饒樂若此者乎。楚王之獵。孰與寡人乎。僕下車對曰。臣。楚國之鄙人也。幸得宿衛。十有餘年。時從出遊。遊於後園。覽於有無。然猶未能徧覩也。又焉足以言其外澤乎。齊王曰。雖然。略以子之所聞見而言之。僕對曰。唯唯。臣聞楚有七澤。

嘗見其一。未覩其餘也。臣之所見。蓋特其小小者耳。名曰雲夢。雲夢者。方九百里。其中有山焉。其山則盤紆。峩鬱。隆崇。嶄崒。岑崟參差。日月蔽虧。交錯糾紛。上干青雲。罷池陂陀。下屬江河。其土則丹青赭堊。雌黃白垩。錫碧金銀。衆色炫耀。照爛龍鱗。其石則赤玉玫瑰。琳瑯昆吾。城功玄厲。硬石砥砮。其東則有蕙圃。衡蘭。茝若。芎藭。菖蒲。沆薺。蘼蕪。燕諸。柘巴苴。其南則有平原。廣澤。登降陁靡。案衍壇曼。緣以大江。限以巫山。其高燥則生葳薺。苞荔。薛莎。青蘋。其埤溼則生藏蓂。菹葹。東牆彫胡。蓮藕。菰蘆。菴闥。軒于。衆物居之。不可勝圖。其西則有涌泉。清池。激水。推移。外發芙蓉。菱華。內隱鉅石。白沙。其中則有神龜。蛟鼉。瑇瑁。鼈鼉。其北則有陰林。巨樹。榎。桫。豫章。桂。椒。木蘭。檠。離朱。楊。櫨。檉。棗。棗。栗。橘。柚。芬芳。其上則有鸛。鷓。孔。鸞。騰。遠。射。干。其下則

有白虎玄豹。曼蛇羆狂。於是乎乃使專諸之倫。手格
此獸。楚王乃駕馴駁之駟。乘雕玉之輿。靡魚須之橈。
旗曳明月之珠旗。建干將之雄戟。左烏號之雕弓。右
夏服之勁箭。陽子驂乘。織阿爲御。案節未舒。卽陵狡
獸。蹴蛩蛩。麟距虛。軼野馬。轉駟駘。乘遺風。射游騏。倏
眇情。洌雷動。焱至星流。霆擊弓不虛發。中必決皆。洞
胸達掖。絕乎心繫。獲若雨獸。揜草蔽地。於是楚王乃
弭節徘徊。翱翔容與。覽乎陰林。此卽其北
之陰林觀壯士之
暴怒。與猛獸之恐懼。徼訃受詘。殫覩衆物之變態。於
是鄭女曼姬。被阿緡。揄紵。綰雜織羅。垂霧縠。襲積褰。
縐紆徐委曲。鬱橈谿谷。粉粉排排。揚施戍削。蜚襪垂
髻。扶輿猗靡。翕呬萃蔡。下摩蘭蕙。上拂羽蓋。錯翡翠
之葳蕤。繆繞玉綏。眇眇忽忽。若神仙之髣髴。於是乃
相與獠於蕙圃。此卽東
之蕙圃嫫嫫勃萃上乎。金隄揜翡翠。

射駿驥微增出。熾繳施。弋白鵠。連鴛鴦。雙鶴下。玄鶴

加。怠而後發。游於清池。此即西之涌泉清池浮文鵠。揚旌棧。張

翠帷。建羽蓋。罔瑋瑁。鉤紫貝。縱金鼓。吹鳴籟。榜人歌

聲流。喝水蟲。駭波鴻。沸涌泉。起奔揚。會礪石。相擊碾

碾。磕磕若雷霆之聲。聞乎數百里之外。將息撩者。擊

靈鼓。起烽燧。車按行。騎就隊。纏乎淫淫。般乎裔裔。於

是。楚王乃登雲陽之臺。雲陽在巫山下。此即至其南也怕乎無爲。憺

乎。自持勺藥之和具。而後御之。不若大王終日馳騁。

曾不下輿。將割輪焮。自以爲娛。臣竊觀之。齊殆不如。

於是齊王無以應僕也。烏有先生曰。是何言之過也。

足下不遠千里。來貺齊國。王悉發境內之士。備車騎

之衆。與使者出畋。乃欲戮力致獲。以娛左右。何名爲

夸哉。問楚地之有無者。願聞大國之風烈。先生之餘

論也。今足下不稱楚王之德厚。而盛推雲夢以爲高。

奢言淫樂而顯侈靡。竊爲足下不取也。必若所言。固非楚國之美也。無而言之。是害足下之信也。彰君惡。傷私義。二者無一可。而先生行之。必且輕於齊而累於楚矣。且齊東階鉅海。南有琅邪。觀乎成山。射乎之罘。浮渤海。游孟諸。邪與肅慎爲鄰。右以湯谷爲界。秋田乎青丘。徬徨乎海外。吞若雲夢者。八九於其胸中。曾不蒂芥。若乃倣儻瑰瑋。異方殊類。珍怪鳥獸。萬端鱗峙。充牣其中。不可勝記。禹不能名。高不能計。然在諸侯之位。不敢言遊戲之樂。苑囿之大。先生又見客。是以王辭不復。何爲無以應哉。

司馬長卿上林賦 ○○○

士是公听然而笑曰。楚則失矣。而齊亦未爲得也。夫使諸侯納貢者。非爲財幣。所以述職也。封疆畫界者。非爲守禦。所以禁淫也。今齊列爲東藩。而外私肅慎。

捐國踰限。越海而田。其於義固未可也。且二君之論。不務明君臣之義。正諸侯之禮。徒事爭游戲之樂。苑囿之大。欲以奢侈相勝。荒淫相越。此不可以揚名發譽。而適足以卑君自損也。且夫齊楚之事。又烏足道乎。君未覩夫巨麗也。獨不聞天子之上林乎。左蒼梧。右西極。丹水更其南。紫淵徑其北。終始霸漭。出入涇渭。豐鎬潦滂。紆餘委蛇。經營乎其內。蕩蕩乎。八川分流。相背而異態。東西南北。馳騖往來。出乎椒丘之闕。行乎洲淤之浦。經乎桂林之中。過乎泱漭之壑。汨乎混流。順阿而下。赴隘陬之口。觸穹石。激堆埼。沸乎暴怒。洶涌澎湃。澤弗宓汨。偪側泌澌。橫流逆折。轉騰淅冽。滂瀼沆漑。穹隆雲橈。宛潭膠盭。踰波趨滉。涖涖下瀨。批巖衝擁。奔揚滯沛。臨坻注壑。灑灑賈墜。沈沈隱隱。砰磅訇礚。滂滂澑澑。澑澑拾漶。鼎沸馳波。跳沫汨潏。漂

疾悠遠。長懷寂漻。無聲肆乎永歸。然後灑泔潢漾。安
翔徐回。翯乎瀄瀄。東注太湖。衍溢陂池。於是乎蛟龍
赤螭。鉅鱗漸離。鰓鰈鰓魴。禺禺魴鯪。捷緒掉尾。振鱗
奮翼。潛處乎深巖。魚鼈謹聲。萬物衆夥。明月珠子的
爍。江靡蜀石黃磬。水玉磊砢。磷磷爛爛。采色滌汗。藜
積乎其中。鴻鸕鷀鴛。鴛鴦屬玉。交精旋日。煩鶩庸渠。
箴疵鳩盧。羣浮乎其上。沈淫泛濫。隨風澹淡。與波搖
蕩。奄薄水渚。啞唳菁藻。咀嚼菱藕。於是乎崇山矗矗。
龍嵒崔巍。深林巨木。斬巖參差。九峻截薛。南山峩峩。
巖陀甌錡。摧萎崛崎。振溪通谷。蹇產溝瀆。谿呀豁閭。
阜陵別隴。歲魄氓廆。丘虛堀壘。隱鱗鬱嶼。登降施靡。
陂池綽豸。沈溶淫鬻。散渙夷陸。亭皋千里。靡不被築。
揜以綠蕙。被以江薤。糝以蘼蕪。雜以留夷。布結縷。攢
戾莎。揭車衡蘭。橐本射干。苾薑蘘荷。歲持若蓀。鮮支

黃磔。蔣茅青蘋。布濩閔澤。延曼太原。離靡廣衍。應風披靡。吐芳揚烈。郁郁菲菲。衆香發越。肸蠶布寫。晻藿必蕪。於是乎。周覽泛觀。縝紛軋芴。芒芒恍忽。視之無端。察之無崖。日出東沼。入乎西陂。其南則隆冬生長。涌水躍波。其獸則獮旄獬犛。沈牛塵麋。赤首圓題。窮奇象犀。其北則盛夏含凍裂地。涉冰揭河。其獸則麒麟角端。騶駼橐駝。蛩蛩驂騾。馱馱驢羸。於是乎。離宮別館。彌山跨谷。高廊四注。重坐曲閣。華棖壁璫。輦道纒屬。步櫺周流。長途中宿。夷峻築堂。累臺增成。巖突洞房。頰杳眇而無見。仰爰燎而捫天。奔星更於閨闈。宛虹拖於楯軒。青龍蚺蟻於東箱。象輿婉憚於西清。靈囿燕於閒館。偃佺之倫。曩於南榮。醴泉涌於清室。通川過乎中庭。盤石振崖。嶽巖倚傾。嵯峨嶻嶭。刻削崢嶸。玫瑰碧琳。珊瑚叢生。璫玉旁唐。玢函文鱗。赤瑕

駁犖雜畝其閒。鼉采琬琰。和氏出焉。於是乎。盧橘夏
熟。黃甘橙棗。枇杷燃柿。亭柰厚朴。棊棗楊梅。櫻桃蒲
陶。隱夫藟棗。荅逯離支。羅乎後宮。列乎北園。馳上陵
下平。原揚翠葉。扞紫莖。發紅華。垂朱榮。煌煌扈扈。照
曜鉅野。沙棠櫟櫚。華楓枰櫨。留落胥邪。仁頻并閭。欒
檀木蘭。豫章女貞。長千仞。大連抱。夸條直暢。實葉稜
楸。攢立叢倚。連卷擺危。崔錯發。翫抗衡。閭珂垂條。扶
疏落英。幡纒紛溶。箭蓼猗猗。從風薊苳。歛蓋象金
石之聲。管籥之音。傑池芘虎。旋還乎後宮。雜襲絜輯。
被山緣谷。循坂下隰。視之無端。究之無窮。於是乎。玄
猿素雌。雌攫飛蠅。蛭蝟蠖獠。漸胡穀蛭。棲息乎其閒。
長嘯哀鳴。翩幡互經。夭矯枝格。偃蹇杪顛。踰絕梁。騰
殊榛。捷垂條。掉希閒。牢落陸離。爛熳遠遷。若此者數
百千處。娛遊往來。宮宿館舍。庖廚不徙。後宮不移。百

官備具。於是乎。背秋涉冬。天子校獵。乘鏤象。六玉虬。

拖霓旌。靡雲旗。前皮軒。後道游。孫叔奉轡。衛公驂乘。

扈從橫行。出乎四校之中。鼓嚴簿。縱獵者。江河為陸。

泰山為櫓。車騎霽起。殷天動地。先後陸離。離散別追。

淫淫裔裔。緣陵流澤。雲布雨施。生貔豹。搏豺狼。手熊

羆。足壅羊。蒙鶡蘇。絳白虎。霽按續書輿服志云武冠

雙鶡尾五官左右虎賁羽林中郎將羽林左右監皆

冠鶡冠虎賁將虎文絳襄邑歲獻織成虎文此乃所

云蒙鶡蘇絳白虎也孟康注鶡鶡尾也蘇析羽也

蓋得之而善注謬甚郭景純以絳為絆亦失之被

班文跨壅馬。凌三峻之危。下磧歷之坻。徑峻赴險。越

壑厲水。推蜚廉。弄獬豸。格蝦蛤。鉞猛氏。羅馭裏。射封

豕。箭不苟害。解脰陷腦。弓不虛發。應聲而倒。於是乎。

乘輿弭節徘徊。翱翔往來。睨部曲之進退。覽將帥之

變態。然後侵淫促節。儵復遠去。流離輕禽。蹴履狡獸。

躡白鹿。捷狡兔。軼赤電。遺光耀。追怪物。出宇宙。鬱蕃

弱滿白羽射游梟。櫟蜚遽擇肉而后發。先中而命處。弦矢分藝。燼仆然后揚節。而上浮。凌驚風。歷駭森。乘虛無與神。俱躡玄鶴。亂昆雞。道孔鸞。促鷓鷯。拂翳鳥。捎鳳皇。捷鷓鷯。鷄揜焦明。道盡塗殫。迴車而還。招搖乎襄羊。降集乎北紘。率乎直指。晦乎反鄉。歷石闕。歷封巒。過鳩鵲。望露寒。下棠梨。息宜春。西馳宣曲。濯鷓牛。首登龍臺。掩細柳。觀士大夫之勤略。均獵者之所得。獲徒車之所轡。轢步騎之所蹂。若人臣之所蹈。藉與其窮極。倦飢驚憚。讐伏不被。創刃而死者。他他藉藉。填阮滿谷。掩平彌澤。於是乎。游戲懈怠。置酒乎顛天之臺。張樂乎膠葛之寓。撞千石之鍾。立萬石之虞。建翠華之旗。樹靈鼉之鼓。奏陶唐氏之舞。聽葛天氏之歌。千人唱。萬人。和。山陵爲之震動。川谷爲之蕩波。巴渝宋蔡。淮南干遮。文成顛歌。族居遞奏。金鼓迭起。鏗

鎗鬪輪洞心駭耳。荆吳鄭衛之聲韶濩武象之樂陰淫。案衍之音鄢郢。繽紛激楚。結風俳優。侏儒狄鞮之倡。所以娛耳目。樂心意者。麗靡爛漫於前。靡曼美色。若夫青琴宓妃之徒。絕殊離俗。妖冶嫺都。靚粧刻飾。便嬛綽約。柔橈嫚嫚。嫵媚熾弱。曳獨繭之褕緜。眇閭易以卹削。便姍嬖屑。與俗殊服。芬芳漚鬱。酷烈淑郁。皓齒粲爛。宜笑的皪。長眉連娟。微睇絲藐。色授魂與。心愉於側。於是酒中樂酣。天子芒然而思。似若有亡。曰。嗟乎。此大奢侈。朕以覽聽餘閒。無事棄日。順天道以殺伐。時休息於此。恐後葉靡麗。遂往而不返。非所以爲繼嗣創業垂統也。於是因乃解酒罷獵。而命有司曰。地可墾闢。悉爲農郊。以贍萌隸。墮牆填塹。使山澤之人得至焉。實陂池而勿禁。虛宮館而勿仞。發倉廩以救貧窮。補不足。恤鰥寡。存孤獨。出德號。省刑罰。

改制度。易服色。革正朔。與天下爲圓始。於是歷吉日。以齋戒。襲朝服。乘法駕。建華旗。鳴玉鸞。游乎六藝之圃。馳騫乎仁義之塗。覽觀春秋之林。射狸首。兼騶虞。弋玄鶴。舞干戚。載雲罕。揜羣雅。悲伐檀。樂樂胥。修容乎禮園。翱翔乎書圃。述易道。放怪獸。登明堂。坐清廟。次羣臣。奏得失。四海之內。靡不受獲。於斯之時。天下大說。鄉風而聽。隨流而化。焄然興道而遷義。刑錯而不用。德隆於三王。而功羨乎五帝。若此。故獵乃可喜也。若夫終日馳騁。勞神苦形。罷車馬之用。抗士卒之精。費府庫之財。而無德厚之恩。務在獨樂。不顧衆庶。忘國家之政。貪雉兔之獲。則仁者不由也。從此觀之。齊楚之事。豈不哀哉。地方不過千里。而囿居九百。是艸木不得墾辟。而民無所食也。夫以諸侯之細。而樂萬乘之所侈。僕恐百姓被其尤也。於是二子愀然改

辭賦類六

古文辭類纂六十七

司馬長卿哀二世賦。

登陂陁之長阪兮。登入曾宮之嵯峨。臨曲江之隄州兮。望南山之參差。巖巖深山之窅窅兮。通谷蹇乎谿澗。汨滅翕習以永逝兮。注平臯之廣衍。觀衆樹之墀藂兮。覽竹林之榛榛。東馳土山兮。北揭石瀨。彌節容與兮。歷弔二世。持身不謹兮。亡國失執。信讒不寤兮。宗廟滅絕。嗚呼哀哉。操行之不得固。墳墓蕪穢而不修兮。魂無歸而不食。夙邈絕而不齊兮。彌久遠而愈休。精罔闕而飛揚兮。拾九天而永逝。嗚呼哀哉。

司馬長卿大人賦。

世有大人兮。在於中州。宅彌萬里兮。曾不足以少留。悲世俗之迫隘兮。竭輕舉而遠游。垂絳幡之素蜺兮。載雲氣而上浮。建格澤之長竿兮。總光耀之采旄。垂

旬始以爲慘兮。捩彗星而爲髻。掉指橋以偃蹇兮。又
旖旎以招搖。攬欃槍以爲旌兮。靡屈虹而爲綢。紅杏
渺以眩湑兮。焱風涌而雲浮。駕應龍象輿之螭。略倭
麗兮。驂赤螭青蚪之蚺。蟠蜿蜒低仰。天蟠据以驕。驚
兮。詘折隆窮。躩以連卷。沛艾赴螟。乞以佶儼兮。放散
畔岸。驤以孱顏。踉蹌躑躅。容以倭麗兮。綢繆偃蹇。怵
燠以梁倚。糾蓼叫稟。踴以艘路兮。蔑蒙踊躍。騰而狂
趨。蒼蠅卉翕。慄至電過兮。煥然霧除。霍然雲消。邪絕
少陽而登太陰兮。與真人乎相求。互折窈窕以右轉
兮。橫厲飛泉以正東。悉徵靈圉而選之兮。部署衆神
於瑤光。使五帝先導兮。反太一而從陵陽。左玄冥而
右含靄兮。前陸離而後瀟灑。廝征伯僑而役羨門兮。
屬岐伯使尚方。祝融警而蹕御兮。清氣氛而後行。屯
余車其萬乘兮。綵雲蓋而樹華旗。使句芒其將行兮。

吾欲往乎南嬉。歷唐堯於崇山兮。過虞舜於九疑。紛
湛湛其差錯兮。雜逯膠葛以方馳。騷擾衝菴其相紛
拏兮。滂瀆決軋灑以林離。鑽羅列聚叢以龍茸兮。衍
曼流爛壇以陸離。徑入雷室之砰磷鬱律兮。洞出鬼
谷之崖巘嵬。穰徧覽八紘而觀四荒兮。竭度九江而
越五河。經營炎火而浮弱水兮。杭絕浮渚而涉流沙。
奄息總極汎濫水嬉兮。使靈媧鼓瑟而舞馮夷。時若
夔夔將混濁兮。召屏翳誅風伯而刑雨師。西望崑崙
之軋沕恍忽兮。直徑馳乎三危排閭闔而入帝宮兮。
載玉女而與之歸。舒閭風而搖集兮。亢烏騰而一止。
低回陰山翔以紆曲兮。吾乃今日睹西王母矐然白
首戴勝而穴處兮。亦幸有三足鳥爲之使。必長生若
此而不死兮。雖濟萬世不足以喜。回車竭來兮。絕道
不周。會食幽都。呼吸沆瀣兮。餐朝霞。噍咀芝英兮。噤

瓊華。嬾侵。淖而高。縱兮。紛鴻。涌而上。厲貫。列缺之。倒
 景兮。涉豐。隆之。滂沛。馳游。道而修。降兮。驚遺。霧而遠
 逝。迫區。中之。隘陝兮。舒節。出乎。北垠。遺屯。騎於。玄闕
 兮。軼先。驅於。寒門。下崢。嶸而。無地兮。上寥。廓而。無天
 視眩。眠而。無見兮。聽愴。恍而。無聞。乘虛。無而。上假兮。
 超無。友而。獨存。鼎按此賦多取於遠遊先訪求
下周覽天地之間自於微閭以下分東南西北四段
此賦自橫厲飛泉以正東以下分東南西北四段而
求仙人之居意即載其間末六句與遠遊語同然屈
子意在遠去世之沉濁故云至清而與太初為鄰長
友則謂帝若果能為此邪與屈子語同而意別矣

司馬長卿長門賦

有序○○○

孝武皇帝陳皇后時得幸頗妒別在長門宮愁悶悲
 思聞蜀郡成都司馬相如天下工為文奉黃金百斤
 為相如文君取酒因于解悲愁之辭而相如為文以
 悟主上陳皇后復得親幸其辭曰

夫何一佳人兮。步逍遙以自虞。魂踰佚而不返兮。形
枯槁而獨居。言我朝往而暮來兮。飲食樂而忘人。心
慊移而不省故兮。交得意而相親。伊予志之慢愚兮。
懷貞慤之歡心。願賜問而自進兮。得尚君之玉音。奉
虛言而望誠兮。期城南之離宮。修薄具而自設兮。君
曾不肯乎幸臨。廓獨潛而專精兮。天飄飄而疾風。登
蘭臺而遙望兮。神怳怳而外淫。浮雲鬱而四塞兮。天
窈窈而晝陰。雷殷殷而響起兮。聲象君之車音。飄風
迴而赴閨兮。舉帷幄之襜襜。桂樹交而相紛兮。芳酷
烈之閭閭。孔雀集而相存兮。玄猿嘯而長吟。翡翠脅
翼而來萃兮。鸞鳳飛而北南。心憑噫而不舒兮。邪氣
壯而攻中。下蘭臺而周覽兮。步從容於深宮。正殿塊
以造天兮。鬱竝起而穹崇。閒徙倚於東廂兮。觀夫靡
靡而無窮。擠玉戶以撼金鋪兮。聲嘈呶而似鐘音。刻

木蘭以爲棖兮。飾文杏以爲梁。羅丰茸之游樹兮。離樓梧而相撐。施瑰木之櫛櫨兮。委參差以棟梁。時髣髴以物類兮。象積石之將將。五色炫以相曜兮。爛耀耀而成光。綴錯石之瓊甃兮。象瑋瑁之文章。張羅綺之幔帷兮。垂楚組之連綱。撫柱楣以從容兮。覽曲臺之央央。白鶴噉以哀號兮。孤雌跼於枯楊。日黃昏而望絕兮。悵獨託於空堂。懸明月以自照兮。徂清夜於洞房。援雅琴以變調兮。奏愁思之不可長。按流徵以卻轉兮。聲幼妙而復揚。貫歷覽其中操兮。意慷慨而自卬。左右悲而垂淚兮。涕流離而縱橫。舒息悒而增歎兮。蹠履起而彷徨。揄長袂以自翳兮。數昔日之誓殃。無面目之可顯兮。遂頽思而就牀。搏芬若以爲枕兮。席荃蘭而蒞香。忽寢寐而夢想兮。魄若君之在旁。惕寤覺而無見兮。魂茫茫若有亡。衆雞鳴而愁予兮。

起視月之精光。觀衆星之行列。今畢昴出於東方。望中庭之藹藹。今若季秋之降霜。夜曼曼其若歲。今懷鬱鬱。其不可再更。澹偃蹇而待曙。今荒亭亭而復明。妾人竊自悲兮。究年歲而不敢忘。

司馬長卿難蜀父老。○○

漢興七十有八載。德茂存乎六世。威武紛紜。湛恩汪濊。羣生霑濡。洋溢乎方外。於是乃命使西征。隨流而攘。風之所被。罔不披靡。因朝冉從驩。定笮存邛。略斯榆。舉苞蒲。結軌還轅。東鄉將報。至於蜀都。耆老大夫。薦紳先生之徒。二十有七人。儼然造焉。辭畢。因進曰。蓋聞天子之於夷狄也。其義羈縻勿絕而已。今罷三郡之士。通夜郎之塗。三年於茲。而功不竟。士卒勞倦。萬民不贍。今又接以西夷。百姓力屈。恐不能卒業。此亦使者之累也。竊爲左右患之。且夫邛笮西隸之與

中國並也。歷年茲多。不可記已。仁者不以德來。彊者不以力并。意者其殆不可乎。今割齊民以附夷狄。弊所恃以事無用。鄙人固陋。不識所謂。使者曰。烏謂此邪。必若所云。則是蜀不變服。而巴不化俗也。余尚惡聞若說。然斯事體大。固非觀者之所覲也。余之行急。其詳不可得聞已。請爲大夫龕陳其略。蓋世必有非常之人。然後有非常之事。有非常之事。然後有非常之功。夫非常者。固常人之所異也。故曰。非常之原。黎民懼焉。及臻厥成。天下晏如也。昔者鴻水滄出。汎濫溢溢。民人登降移徙。崎嶇而不安。夏后氏戚之。乃堙鴻水。決江疏河。漉沈贍菑。東歸之於海。而天下永寧。當斯之勤。豈惟民哉。心煩於慮。而身親其勞。躬鬪胝無跋。膚不生毛。故休烈顯乎無窮。聲稱浹乎于茲。且夫賢君之踐位也。豈特委瑣握籥。拘文牽俗。循誦習

傳當世取說云爾哉。必將崇論閎議，創業垂統，爲萬世規。故馳騫乎兼容并包，而勤思乎參天貳地。且詩不云乎：普天之下，莫非王土；率土之濱，莫非王臣。是以六合之內，八方之外，浸浚衍溢，懷生之物，有不浸潤於澤者，賢君恥之。今封疆之內，冠帶之倫，咸獲嘉祉，靡有闕遺矣。而夷狄殊俗之國，遼絕異黨之地，舟輿不通，人迹罕至，政教未加，流風猶微。內之則犯義侵禮於邊境，外之則邪行橫作，放弑其上。君臣易位，尊卑失序，父兄不辜，幼孤爲奴，圜係累號泣，內嚮而怨。曰：蓋聞中國有至仁焉，德洋而恩普，物靡不得其所。今獨曷爲遺己，舉踵思慕，若枯旱之望雨，鑿夫爲之垂涕。況乎上聖，又惡能已。故北出師以討彊胡，南馳使以誚勁越，四面風德，二方之君，鱗集仰流，願得受號者，以億計。故乃闢沫若，徼牂牁，鏤靈山，梁孫原。

創道德之塗。垂仁義之統。將博恩廣施。遠撫長駕。使
疏逖不閉。矧爽闇昧。得耀乎光明。以偃甲兵於此。而
息誅伐於彼。遐邇一體。中外禔福。不亦康乎。夫拯民
於沈溺。奉至尊之休德。反衰世之陵遲。繼周氏之絕
業。斯乃天子之急務也。百姓雖勞。又惡可以已哉。且
夫王事固未有不始於憂勤。而終於佚樂者也。然則
受命之符。合在於此矣。方將增泰山之封。加梁父之
事。鳴和鸞。揚樂頌。上咸五。下登三。觀者未覩。指聽者
未聞。音猶鷦明。已翔乎寥廓。而羅者猶視乎藪澤。悲
夫。於是諸大夫茫然喪其所懷來。而失厥所以進。喟
然竝稱曰。允哉漢德。此鄙人之所願聞也。百姓雖勞。
請以身先之。敞罔靡徙。因遷延而辭避。

司馬長卿封禪文。○

伊上古之初肇。自昊穹生民。歷選列辟。以迄乎秦。率

邇者踵武。逖聽者風聲。紛綸威毅。堙滅而不稱者。不可勝數。繼韶夏。崇號謚。略可道者。七十有二君。罔若淑而不昌。疇逆失而能存。軒轅之前。遐哉邈乎。其詳不可得聞已。五三六經載籍之傳。惟見可觀也。書曰。元首明哉。股肱良哉。因斯以談。君莫盛於唐堯。臣莫賢於后稷。后稷創業於唐。公劉發迹於西戎。文王改制。爰周邛隆。大行越成。伯父薑塢先生云。成即成王也。下云躡梁父登泰山。即管子所云成王封泰山禪社首。而后陵遲衰微。千載亡聲。豈不善始善終哉。然無異端。慎所由於前。謹遺教於後耳。故軌迹夷易。易遵也。湛恩龐洪。易豐也。憲度著明。易則也。垂統理順。易繼也。是以業隆於襁褓。而崇冠乎二后。揆厥所元。終都攸卒。未有殊尤絕迹。可考於今者也。鼎按此處文則狹小成王而夸漢實則謂古聖謹慎之道。易遵易繼。今舍之而更爲浩侈。則難以遵繼。古聖所未爲而今然猶躡梁父登太山。建顯號。施尊名。欲過之可乎。

大漢之德。逢涌原泉。沕涌曼羨。旁魄四塞。雲布霧散。上暢九垓。下泝八埏。懷生之類。沾濡漫潤。協氣橫流。武節焱逝。爾陞游原。迴闊泳末。首惡鬱沒。闇昧昭晰。昆蟲闐懽。回首面內。然後囿騶虞之珍羣。徼麋鹿之怪獸。導一莖六穗於庖。犧雙觝共抵之獸。獲周餘放。龜于岐。招翠黃乘龍於沼。鬼神接靈圉。賓於閒館。奇物譎詭。倣儻窮變。欽哉。符瑞臻茲。猶以爲德薄。不敢道封禪。蓋周躍魚隕杭。休之以燎。微夫斯之爲符也。以登介丘。不亦恧乎。進攘之道。何其爽與。於是大司馬進曰。陛下仁育羣生。義征不諱。諸夏樂貢。百蠻執贄。德牟往初。功無與二。休烈浹洽。符瑞衆變。期應紹至。不特創見。意者太山梁父。設壇場。望幸蓋。伯父薑塢先生云師古曰蓋發語辭予謂當如考工記輪人爲蓋之蓋號以況榮上帝垂恩儲社將以薦成陛下謙讓而弗發也挈三神之歡缺王

道之儀。羣臣慝焉。或謂且天爲質。伯父薑塢先生云。傳云且。閻示珍符。固不可辭。若然辭之。是泰山靡記。此也。

而梁父罔幾也。亦各並時而榮。咸濟厥世而屈。說者尚何稱於後。而云七十二君哉。夫修德以錫符。奉符以行事。不爲進越也。故聖王弗替。而修禮地祇。謁款天神。勒功中岳。以章至尊。舒盛德。發號榮。受厚福。以漫黎民。皇皇哉斯事。天下之壯觀。王者之不業。不可貶也。願陛下全之。而后因雜縉紳先生之略術。使獲曜日月之末光。絕炎以展采。錯事猶兼正列其義。祕飾厥文。作春秋一藝。將襲舊六爲七。據之無窮。俾萬世得激清流。揚微波。蜚英聲。騰茂實。前聖之所以永保鴻名。而常爲稱首者用此。宜命掌故。悉奏其儀而覽焉。於是天子沛然改容曰。俞乎。朕其試哉。乃遷思回慮。總公卿之議。詢封禪之事。詩大澤之博。廣符瑞

之富。遂作頌曰。自我天覆。雲之油油。甘露時雨。厥壤可游。滋液滲漉。何生不育。嘉穀六穗。我稽曷蓄。匪唯雨之。又潤澤之。匪唯濡之。汎布護之。萬物熙熙。懷而慕思。名山顯位。望君之來。君乎君乎。侯不邁哉。般般之獸。樂我君囿。白質黑章。其儀可嘉。攸攸穆穆。君子之態。蓋聞其聲。今視其來。厥塗靡從。天瑞之徵。茲爾於舜。虞氏以興。濯濯之麟。遊彼靈時。孟冬十月。君徂郊祀。馳我君輿。帝用享祉。三代之前。蓋未嘗有。宛宛黃龍。興德而升。采色炫耀。煥炳輝煌。正陽顯見。覺寤黎烝。於傳載之。云受命所乘。厥之有章。不必諄諄。依類託寓。諭以封巒。披藝觀之。天人之際。已交。上下之情。允洽。聖王之德。兢兢翼翼。故曰。於興必慮衰。安必思危。是以湯武至尊嚴。不失肅祗。舜在假典。顧省厥遺。此之謂也。

伯父薑塢先生云。封禪文相如。創爲之體。兼賦頌。其設意措辭。皆翔躡虛無。非

如揚班之徒誕妄貢諛為蹠實之文也通體結構若
無畔岸如雲興水溢一片渾茫駿邈之氣觀揚班
如之作而後知相活

古文辭類纂六十七

辭賦類七

古文辭類纂六十八

揚子雲甘泉賦

○○○

孝成帝時。客有薦雄文似相如者。上方郊祠甘泉泰
時汾陰后土。臣求繼嗣。召雄待詔承明之庭。正月。從
上甘泉。還。奏甘泉賦。臣風其辭曰。

惟漢十世。將郊上玄。定泰時。雍神休。尊明號。同符三
皇。錄功五帝。卹亂錫羨。拓迹開統。於是乃命羣僚。歷
吉日。協靈辰。星陳而天行。詔招搖與太陰兮。伏鉤陳
使當兵。屬堪輿以壁壘兮。稍夔臚而扶猶狂。八神奔
而警蹕兮。振殷麟而軍裝。蚩尤之倫帶于將而秉玉
戚兮。飛蒙茸而走陸梁。齊總總以搏搏其相膠鬪兮。
焱駭雲迅奮以方攘。駢羅列布鱗以雜沓兮。傑僂參
差魚頡而鳥脰。翕赫矍霍霧集而蒙合兮。半散照爛
粲以成章。於是乘輿乃登。夫鳳皇兮。而翳華芝。駟蒼

螭兮六素虬。螭略蕤綬。離虛慘纏。帥爾陰閉。雪然陽
開。騰清霄而軼浮景兮。夫何旛旄邛偈之旖旎也。流
星旄以電爍兮。咸翠蓋而鸞旗。屯萬騎於中營兮。方
玉車之千乘。聲駟隱以陸離兮。輕先疾雷而馭遺風。
凌高衍之崿嶢兮。超紆譎之清澄。登椽欒而扞天門
兮。馳閶闔而入凌兢。是時未轅夫甘泉也。迺望通天
之繹繹。下陰潛以慘懍兮。上洪紛而相錯。直嶢嶢以
造天兮。厥高慶而不可乎彌度。平原唐其壇曼兮。列
新雉於林薄。攢并閭與茭蔿兮。紛被麗其亡鄂。崇亾
陵之駸馘兮。深溝欽巖而爲谷。迆迆離宮般以相爍
兮。封巒石關池靡乎延屬。於是大廈雲譎波詭。摧嗑
而成。觀仰橋首以高視兮。目冥眴而亡見。正瀏盪以
弘愴兮。指東西之漫漫。徒徊徊以徨徨兮。魂固眇眇
而昏亂。據軫軒而周流兮。忽坱圠而亡垠。翠玉樹之

青蔥兮壁馬犀之麟。璠金人仡仡其承鐘。虞兮嵌巖
巖其龍鱗。揚光曜之燎爚兮。垂景炎之忻忻。配帝居
之懸圃兮。象泰壹之威神。洪臺崛其獨出兮。楸北極
之嶙嶙。列宿迺施於上榮兮。日月纒經於棟振。雷鬱
律於巖窔兮。電倏忽於牆藩。鬼魅不能自逮兮。半長
途而下顛。歷倒景而絕飛梁兮。浮蟻蠊而撇天左攬
槍。而右玄冥兮。前漂闕而後應門。蔭西海與幽都兮。
涌醴汨以生川。蛟龍連蜷於東厓兮。白虎敦圉乎崑
崙。覽樛流於高光兮。溶方皇於西清。前殿崔巍兮。和
氏瓏玲。抗浮柱之飛榭兮。神莫莫而扶傾。闔閭闔其
寥廓兮。似紫宮之崢嶸。駢交錯而曼衍兮。崦嵫隗乎
其相嬰。乘雲閣而上下兮。紛蒙籠以棍成。曳紅采之
流離兮。颺翠氣之宛延。襲琤室與傾宮兮。若登高眇
遠。亡國亡國字漢書無無是肅乎。臨淵迴焱肆其碣駭兮。披桂

椒而鬱。核楊香芬。菲以穹隆。兮擊薄。櫨而將榮。薌咲
肸以棍批。兮聲駢隱。而歷鍾排。玉戶而颺金鋪。兮發
蘭薰與芎藭。帷彌環其拂汨。兮稍暗暗。而靚深陰。陽
清濁。穆羽相和兮。若夔牙之調琴。般倕棄其剗。闕兮。
王爾投其鉤繩。雖方征僑與倕。佗兮。猶仿佛其若夢。
於是事變物化。目駭耳回。蓋天子穆然。珍臺閒館。璇
題玉英。蠅蝓蠖濩之中。惟夫所以澄心。清魂。儲精。垂
恩。感動天地。逆釐二神者。迺搜述索偶。臯伊之徒。冠
倫魁能。函甘棠之惠。挾東征之意。相與齊乎陽靈之
宮。靡薜荔而爲席兮。折瓊枝以爲芳。翕清雲之流瑕
兮。飲若木之露英。集乎禮神之囿。登乎頌祇之堂。建
光耀之長旂兮。昭華覆之威威。攀璇璣而下視兮。行
遊目乎三危。陳衆車於東阬兮。肆玉軼而下馳。漂龍
淵而還九垓兮。窺地底而上迴。風縱縱而扶轄兮。鸞

鳳紛其銜。蕤梁弱水之漉。潑兮躡不周之倭。蛇想西
王母欣然而上。壽兮屏玉女而卻。宓妃玉女亡所眺
其清。矚兮宓妃曾不得施其蛾眉。方攬道德之精剛
兮。侔神明與之爲資。於是欽柴宗祈。燎薰皇天。招搖
泰壹。舉洪頤。樹靈旗。樵蒸昆上。配藜四施。東灑滄海。
西耀流沙。北熿幽都。南煬丹厓。玄瓚鯨膠。拒鬯泔淡。
肝鬻豐融。懿懿芬芬。炎感黃龍兮。燁訛碩麟。選巫咸
兮。叫帝閭。開天庭兮。延羣神。儻暗藹兮。降清壇。瑞穰
穰兮。委如山。於是事畢功弘。迴車而歸。度三巒兮。偈
棠梨。天閩決兮。地垠開。八荒協兮。萬國諧。登長平兮。
雷鼓磔。天聲起兮。勇士厲。雲飛揚兮。雨滂沛。于胥德
兮。麗萬世。亂曰。崇崇園丘。隆隱天兮。登降剋施。單堦
垣兮。增宮參差。駢嵯峨兮。嶺嶮嶙峋。洞無厓兮。上天
之緯。杳旭卉兮。聖皇穆穆。信厥對兮。徠祇郊禋。神所

依兮徘徊招搖靈遲遲兮輝光眩耀降厥福兮子子
孫孫長無極兮

揚子雲河東賦

○○

其三月將祭后土上迺帥羣臣橫大河湊汾陰既祭
行遊介山回安邑顧龍門覽鹽池登歷觀陟西岳以
望八荒迹殷周之虛眇然巨思唐虞之風雄巨爲臨
川羨魚不如歸而結罔還上河東賦巨勸其辭曰

伊年暮春將瘞后土禮靈祇謁汾陰於東郊因茲巨
勒崇垂鴻發祥隕祉欽若神明者盛哉鑠乎越不可
載已於是命羣臣齊法服整靈輿迺撫翠鳳之駕六
先景之乘掉奔星之流旗覆天狼之威弧張耀日之
玄旄揚左纛被雲梢奮電鞭驟雷輜鳴洪鍾建五旗
羲和司日顏倫奉輿風發颺拂神騰鬼趨千乘霆亂
萬騎屈橋嘻嘻旭旭天地稠敷簸上跳巒涌渭躍涇

秦神下。龔拓魂負。沱河靈。龔踢爪華。蹈襄顏監云爪

按說文爪亦爪也。從反爪。諸兩切。爪持也。故蘇林注此賦云。掌據之。是即持爪之義。不得謂即掌字也。水

經河水下。酈注引掌華。踏襄蓋以音近而相承。失讀久矣。襄漢書作衰。然郊祀志及史記封禪書並作襄

山此文與龔踢協韻。故知作襄為正。衰字誤也。遂臻陰宮。穆穆肅肅。蹲蹲如

也。靈祇既鄉。五位時敘。網緼玄黃。將紹厥後。於是靈

輿安步。周流容與。以覽虛介山。嗟文公而愍推兮。勤

大禹於龍門。灑沈蓄於豁瀆兮。播九河於東瀕。登歷

觀而遙望兮。聊浮游。巨經營。樂往昔之遺風兮。喜虞

氏之所耕。瞰帝唐之嵩高兮。脈隆周之大寧。汨低回

而不能去兮。行晚陔下。與彭城。滅南巢之坎坷兮。易

幽岐之夷平。乘翠龍而超河兮。陟西岳之嶢嶢。雲霧

霏而來迎兮。澤滲離而下降。鬱蕭條其幽藹兮。滄汎

沛。巨豐隆。叱風伯於南北兮。呵雨師於西東。參天地

而獨立兮。廓盪盪其亡。雙遵逝。虛歸來。巨函夏之大

漢兮彼曾何足與比功建乾坤之貞兆兮將悉總之
巨羣龍麗鉤芒與驂蓐收兮服玄冥及祝融敦衆神
使式道兮奮六經巨攄頌踰於穆之緝熙兮過清廟
之雝雝軼五帝之遐迹兮躡三皇之高蹤既發軔於

平盈兮誰謂路遠而不能從之上林之末有遊乎六藝

此文法之借行遊為喻言以天道為車馬以六經
為容行乎帝王之途何必巡歷山川以爲觀覽乎

揚子雲羽獵賦

虎被獵漢先書注家昭注云惟鳥羽語卻

於背若今軍將負人無此疑負非

蓋漢以後制恐古號名者被識所

也相別在軍象其制爲之徽識以

備死事燕京賦辭綜注揮爲肩上

絳幟如燕尾者也以在肩故曰

負韓詩外傳子路曰白羽如月赤

羽如朱然則羽者徽耳以其似

羽非真鳥羽也賦內羽騎營營

分殊專則其取相別識之義明矣

其十二月羽獵雄從以爲昔在二帝三王宮館臺榭

沼池苑囿。林麓藪澤。財足以奉郊廟。御賓客。充庖廚而已。不奪百姓膏腴。穀土桑柘之地。女有餘布。男有餘粟。國家殷富。上下交足。故甘露零其庭。醴泉流其唐。鳳凰巢其樹。黃龍游其沼。麒麟臻其囿。神爵棲其林。昔者禹任益虞。而上下和。草木茂。成湯好田。而天下用足。文王囿百里。民以爲尚小。齊宣王囿四十里。民以爲大。裕民之與奪民也。武帝廣開上林。東南至宜春。鼎湖。御宿。昆吾。旁南山。西至長楊。五柞。北繞黃山。濱渭而東。周袤數百里。穿昆明池。象滇河。營建章。鳳闕。神明馭娑。漸臺。泰液。象海水。周流方丈。瀛洲蓬萊。遊觀侈靡。窮妙極麗。雖頗割其三垂。以贍齊民。然至羽獵。甲車戎馬。器械儲侍。禁籟所營。尚泰奢麗。誇詡非堯舜。成湯。文王三驅之意也。又恐後世復修前好。不折中以泉臺。故聊因校獵。賦以風之。其辭曰。

或稱羲農。豈或帝王之彌文哉。論者云否。各亦並時而得宜。奚必同條而共貫。則泰山之封。焉得七十而有一二儀。是以創業垂統者。俱不見其爽。遐邇五三。孰知其是非。遂作頌曰。麗哉神聖。處於玄宮。富既與地乎侔。訾貴正與天乎比崇。齊桓曾不足使扶輿。楚嚴未足以爲參乘。狹三王之阨僻。嶠高舉而大興。歷五帝之寥廓。陟三皇之登閔。建道德以爲師。友仁義與罔爲朋。於是玄冬季月。天地隆烈。萬物權輿於內。徂落於外。帝將惟田于靈之囿。開北垠。受不周之制。以終始顓頊。玄冥之統。迺詔虞人典澤。東延昆鄰。西馳閶闔。儲積共恃。戍卒夾道。斬叢棘。夷野草。禦自汧渭。經營艷鎬。章皇周流。出入日月。天與地杳。爾迺虎落三巖。以爲司馬。圍經百里。而爲殿門。外則正南極海。邪界虞淵。鴻濛沆茫。碣以崇山。營合圍會。然後先置

乎白楊之南。昆明靈沼之東。賁育之倫。蒙盾負羽。杖
鏌邪而羅者。以萬計。其餘荷垂天之罽。張竟壘之罟。
靡日月之朱竿。曳彗星之飛旗。青雲爲紛。虹蜺爲纒。
屬之乎昆侖之墟。渙若天星之羅。浩如濤水之波。淫
淫與與。前後要遮。攬槍爲闐。明月爲候。熒惑司命。天
弧發射。鮮扁陸離。駢衍似路。徽車輕武。鴻網繞獵。殷
殷軫軫。被陵緣坂。窮夔極遠者。相與剋虜。高原之上。
羽騎營營。眈眈分殊。事續紛往來。輻轡不絕。若光若滅。
者布乎青林之下。於是天子乃以陽暉始出乎玄宮。
撞鴻鍾。建九旒。六白虎。載靈輿。蚩尤並轂。蒙公先驅。
立歷天之旂。曳捎星之旗。霹靂列缺。吐火施鞭。萃從
沈溶。淋離廓落。戲八鎮而開闕。鼎按將獵時先已合
圍天子至乃復開闕
入之然後縱獵。飛廉雲師。吸鼻瀟率。鱗羅布列。攢以龍翰。秋
秋踰踰。入西園。切神光。望平樂。徑竹林。踐蕙圃。踐蘭

唐舉烽烈火。轡者施技。方馳千駟。狡騎萬帥。虓虎之
陳。從橫膠轕。森拉雷厲。驥駢駘。洶洶旭旭。天動地
吸。羨漫半散。蕭條數千里外。若夫壯士。忼慨殊鄉。別
趣。東西南北。騁者奔欲。拖蒼豨。跋犀犛。蹶浮麋。斲巨
挺。搏玄猿。騰空虛。距連卷。踔天蟠。娛澗閒。莫莫紛紛。
山谷爲之風。森林叢爲之生塵。及至獲夷之徒。蹶松
柏。掌疾藜。獵蒙龍。麟輕飛。屨般首。帶修蛇。鉤赤豹。擿
象犀。跼巒阮。超唐陂。車騎雲會。登降閭闔。泰華爲旒。
熊耳爲綴。木仆山還。漫若天外。儲與乎大浦。聊浪乎
宇內。於是天清日晏。逢蒙列薑塢先生云易列羿
其竇列卽今裂字羿。
氏控弦。皇車幽謁。光純天地。望舒彌轡。翼乎徐。至於
上蘭。移圍徙陣。浸淫楚部。曲隊堅重。各按行伍。壁壘
天旋。神扶電擊。逢之則碎。近之則破。鳥不及飛。獸不
得過。軍驚師駭。刮野掃地。及至罕車。飛揚武騎。幸皇

蹈飛豹。躡嘯陽。追天寶。出一方。應駟聲。擊流光。野盡
山窮。囊括其雌雄。沈沈溶溶。遙噓乎絃中。三軍茫然。
窮允闕與。直觀夫剽禽之繼隄。犀兕之抵觸。熊羆之
拏攫。虎豹之凌遽。徒角槍題注。賊竦讐怖。魂亡魄失。
觸輻闕脰。妄發期中。進退履獲。創淫輪夷。亾累陵聚。
於是禽殫中衰。相與集於靖冥之館。以臨珍池。灌以
岐梁。溢以江河。東瞰日盡。西暢亡厓。隨珠和氏。焯爍
其陂。玉石礫崙。眩耀青熒。漢女水潛。怪物暗冥。不可
殫形。玄鸞孔雀。翡翠垂榮。王睢關關。鴻雁嚶嚶。羣娛
乎其中。噍噍昆鳴。鳧鷖振鷺。上下砰磕。聲若雷霆。乃
使文身之技。水格鱗蟲。凌堅冰。犯巖淵。探巖排碕。薄
索蛟螭。蹈擯獺。據黿鼉。祛靈蠃。入洞穴。出蒼梧。乘鉅
鱗。騎京魚。浮彭蠡。目有虞。方椎夜光之流離。剖明月
之珠胎。鞭洛水之宓妃。餉屈原與彭胥。於茲乎鴻生

鉅儒。俄軒冕。雜衣裳。修唐典。匡雅頌。揖讓於前。昭光
振耀。嚮習如神。仁聲惠於北狄。武誼動於南鄰。是以
旃裘之王。胡貉之長。移珍來享。抗手稱臣。前入圍口。
後陳廬山。羣公常伯。楊朱墨翟之徒。喟然竝稱曰。崇
哉乎德。雖有唐虞大夏成周之隆。何以侈茲。太古之
覲東嶽。禪梁基。舍此世也。其誰與哉。上猶謙讓而未
俞也。方將上獵三靈之流。下決醴泉之滋。發黃龍之
穴。窺鳳凰之巢。臨麒麟之囿。幸神爵之林。奢雲夢。侈
孟諸。非章華。是靈臺。罕徂離宮而輟觀遊。土事不飾。
木功不彫。丞民乎農桑。勸之以弗怠。儕男女使莫違。
恐貧窮者不徧。被洋溢之饒。開禁苑。散公儲。創道德
之囿。弘仁惠之虞。馳弋乎神明之囿。覽觀乎羣臣之
有亡。放雉兔。收罝罟。麋鹿芻蕘。與百姓共之。蓋所以
臻茲也。於是醇洪鬯之德。豐茂世之規。加勞三皇。勛

勤五帝。不亦至乎。乃祇莊雍穆之徒。立君臣之節。崇賢聖之業。未遑苑囿之麗。遊獵之靡也。因回軫還衡。背阿房。反未央。

揚子雲長楊賦

有序

明年上將大誇胡人以多禽獸。秋命右扶風發民入南山。西自褒斜。東至弘農。南歐漢中。張羅網罝罟。捕熊羆豪豬虎豹。狄獾狐兔麋鹿。載以檻車。輸長楊射熊館。以網爲周法。縱禽獸其中。令胡人手搏之。自取其獲。上親臨觀焉。是時農民不得收斂。雄從至射熊館。還上長楊賦。聊因筆墨之成文章。故藉翰林以爲主人。子墨爲客卿以風。其辭曰。

子墨客卿問於翰林主人曰。蓋聞聖主之養民也。仁霑而恩洽。動不爲身。今年獵長楊。先命右扶風。左太華而右褒斜。極截薛而爲弋。紆南山以爲罝。羅千乘

於林莽。列萬騎於山隅。帥軍躋陸。錫戎獲胡。搃熊羆。拖豪豬。木擁槍纍。以為儲胥。此天下之窮覽極觀也。雖然亦頗擾于農人。三旬有餘。其厪至矣。而功不圖。恐不識者。外之則以為娛樂之游。內之則不以為乾豆之事。豈為民乎哉。且人君以玄默為神。澹泊為德。今樂遠出。以露威靈。數搖動。以罷車甲。本非人主之急務也。蒙竊惑焉。翰林主人曰。吁。客何謂茲邪。若客所謂。知其一。未睹其二。見其外。不識其內也。僕嘗倦談。不能一二其詳。請略舉其凡。而客自覽其切焉。客曰。唯唯。主人曰。昔有彊秦。封豕其士。窳窳其民。鑿齒之徒。相與磨牙而爭之。豪俊糜沸雲擾。羣黎為之不康。於是上帝眷顧高祖。高祖奉命。順斗極。運天關。橫鉅海。漂崑崙。提劍而叱之。所過靡城擗邑。下將降旗。一日之戰。不可殫記。當此之勤。頭蓬不暇疏。飢不及

餐。鞿整生蠶。介冑被霑汗。以爲萬姓請命乎皇天。
迺展民之所誦。振民之所乏。規億載。恢帝業。七年之
閒。而天下密如也。逮至聖文。隨風乘流。方垂意於至
寧。躬服節儉。緜衣不敝。革鞜不穿。大廈不居。木器無
文。於是後宮賤瑋瑁。而疏珠璣。卻翡翠之飾。除雕琢
之巧。惡麗靡而不近。斥芬芳而不御。抑止絲竹。晏衍
之樂。憎聞鄭衛。幼眇之聲。是以玉衡正而太階平也。
其後熏鬻作虐。東夷橫畔。羌戎睚眦。閩越相亂。遐氓
爲之不安。中國蒙被其難。於是聖武勃怒。爰整其旅。
迺命驃衛。汾沅沸渭。雲合電發。焱騰波流。機駭蠱軼。
疾如奔星。擊如雷霆。碎輶輜。破穹廬。腦沙幕。髓余吾。
遂躡乎王庭。驅橐駝。燒爛蟲。分勢單于。磔裂屬國。夷
阮谷。拔鹵莽。刊山石。蹂屍輿。廝係累老弱。吮鋌癩者。
金鏃淫夷者。數十萬人。皆稽顙樹領。扶服蛾伏。二十

餘年矣。尚不敢惕息。夫天兵四臨幽都。先加迴戈。邪
指南越。相夷靡節。西征羌僰。東馳是以遐方。疏俗殊
鄰。絕黨之域。自上仁所不化。茂德所不綏。莫不躡足
抗手。請獻厥珍。使海內澹然。永亡邊城之災。金革之
患。今朝廷純仁。遵道顯義。并包書林。聖風雲靡。英華
沈浮。洋溢八區。普天所覆。莫不沾濡。士有不談王道
者。則樵夫笑之。意者以爲事罔隆而不殺。物靡盛而
不虧。故平不肆險。安不忘危。迺時以有年。出兵整輿。
竦戎振師。五秭習馬。長楊簡力。狡獸校武。票禽迺萃。
然登南山。瞰烏弋。西厭月窟。東震日域。又恐後代。迷
於一時之事。常以此爲國家之大務。淫荒田獵。陵夷
而不禦也。是以車不安軻。日未靡旗。從者彷彿。馱屬
而還。亦所以奉太尊之烈。遵文武之度。復三王之田。
反五帝之虞。使農不輟耰。工不下機。婚姻以時。男女

莫違。出愷悌。行簡易。矜劬勞。休力役。見百年。存孤弱。帥與之同苦樂。然後陳鐘鼓之樂。鳴鞀磬之和。建碣磻之虞。拈隔鳴球。掉八列之舞。酌允鑠。肴樂胥。聽廟中之雍雍。受神人之福祐。歌投頌。吹合雅。其勤若此。故真神之所勞也。方將俟元符。以禪梁甫之基。增泰山之高。延光于將來。比榮乎往號。豈徒欲淫覽浮觀。馳騁秣稻之地。周流梨栗之林。蹂踐芻蕘。誇詡衆庶。盛狄獲之收。多麋鹿之獲哉。且盲者不見咫尺。而離婁燭千里之隅。客徒愛胡人之獲。我禽獸曾不知我亦已獲。其王侯言未卒。墨客降席再拜稽首曰。大哉體乎。允非小人之所能及也。迺今日發矇。廓然已昭矣。

此篇傲難蜀父老

揚子雲解嘲 ○ ○ ○

客嘲揚子曰。吾聞上世之士。人綱人紀。不生則已。生

則上尊人君。下榮父母。析人之珪。儉人之爵。懷人之符。分人之祿。紆青拖紫。朱丹其轂。今子幸得遭明盛之世。處不諱之朝。與羣賢同行。歷金門。上玉堂。有日矣。曾不能畫一奇。出一策。上說人主。下談公卿。目如耀星。舌如電光。一從一橫。論者莫當。顧默而作太玄五千文。枝葉扶疎。獨說十餘萬言。深者入黃泉。高者出蒼天。大者含元氣。細者入無倫。然而位不過侍郎。擢纔給事黃門。意者玄得無尚白乎。何爲官之拓落也。揚子笑而應之曰。客徒欲朱丹吾轂。不知一跌將赤吾之族也。往者周網解結。羣鹿爭逸。離爲十二。合爲六七。四分五剖。並爲戰國。士無常君。國無定臣。得士者富。失士者貧。矯翼厲翮。恣意所存。故士或自盛以橐。或鑿坏以遁。是故鄒衍以頡頏而取世資。孟軻雖連蹇。猶爲萬乘師。今大漢左東海。右渠搜。前番禺。

後陶塗東南一尉西北一候。徽以糾墨。製以鑽鉢。散以禮樂。風以詩書。曠以歲月。結以倚廬。天下之士。雷動雲合。魚鱗雜襲。咸營于八區。家家自以爲稷契。人人自以爲臯陶。戴縱垂纓而談者。皆擬於阿衡。五尺童子。羞比晏嬰。與夷吾。當塗者升青雲。失路者委溝渠。日握權則爲卿相。夕失勢則爲匹夫。譬若江湖之崖。渤澥之島。乘鴈集。不爲之多。雙鳧飛。不爲之少。昔三仁去而殷虛。二老歸而周熾。子胥死而吳亡。種蠡存而越霸。五穀入而秦喜。樂毅出而燕懼。范雎以折摺而危穰侯。蔡澤以噤吟而笑唐舉。故當其有事也。非蕭曹子房。平勃樊霍。則不能安。當其無事也。章句之徒。相與坐而守之。亦無所患。故世亂則聖哲馳。驚而不足。世治則庸夫高枕。而有餘。夫上世之士。或解縛而相。或釋褐而傅。或倚夷門而笑。或橫江潭而漁。

或七十說而不遇。或立談圓而封侯。或枉千乘於陋巷。或擁鬪彗而先驅。是以上士頗得信其舌而奮其筆。窒隙蹈瑕。而無所詘也。當今縣令不請士。郡守不迎師。羣卿不揖客。將相不俛眉。言奇者見疑。行殊者得辟。是以欲談者卷舌而同聲。欲步者擬足而投跡。鄉使上世之士處乎今。策非甲科。行非孝廉。舉非方正。獨可抗疏時道是非。高得待詔。下觸聞罷。又安得青紫。且吾聞之。炎炎者滅。隆隆者絕。觀雷觀火。爲盈爲實。天收其聲。地藏其熱。高明之家。鬼瞰其室。攫拏者亡。默默者存。位極者宗危。自守者身全。是故知玄知默。守道之極。爰清爰靜。遊神之庭。惟寂惟寞。守德之宅。世異事變。人道不殊。彼我易時。未知何如。今子乃以鴟梟而笑鳳皇。執螻蛄而嘲龜龍。不亦病乎。子徒笑我玄之尚白。吾亦笑子病甚。不遭與跼扁鵲。悲夫。

客曰。然則靡玄無所成名乎。范蔡以下。何必玄哉。揚子曰。范雎。魏之亡命也。折脅拉髀。免於徽索。翕肩蹈背。扶服入橐。激仰萬乘之主。界涇陽。抵穰侯。而代之當也。蔡澤。山東之匹夫也。頓頭折頰。涕唾流沫。西揖疆秦之相。搯其咽。炕其氣。拊其背。而奪其位。時也。天下已定。金革已平。都於洛陽。婁敬委輅。脫輓。掉三寸之舌。建不拔之策。舉中國徙之長安。適也。五帝垂典。三王傳禮。百世不易。叔孫通起於枹鼓之閒。解甲投戈。遂作君臣之儀。得也。呂刑靡敝。秦法酷烈。聖漢權制。而蕭何造律。宜也。故有造蕭何律於唐虞之世。則諄矣。有作叔孫通儀於夏殷之時。則惑矣。有建婁敬之策於成周之世。則繆矣。有談范蔡之說於金張許史之閒。則狂矣。夫蕭規曹隨。留侯畫策。陳平出奇。功若泰山。譽若砥礪。雖其人之瞻智哉。亦會其時之可。

為也。故為可為。於可為之時。則從為不可為。於不可
 為之時。則凶。若夫蘭先生收功於章臺。四皓采榮於
 南山。公孫創業於金馬。驃騎發跡於祁連。司馬長卿
 竊貲於卓氏。東方朔割名於細君。僕誠不能與此數
 子者。並故默然。獨守吾太玄。伯父薑瑤先生云。雄偉
 瑰麗。後人於此不能復
加恢奇矣。竊按此文前半以取爵位富貴為說。後
半以前後再言之。而義別非重復也。未數句言人之取
侯有建功於世者。有高隱者。又復有以放誕之行使人
名。異若司馬長卿。東方朔亦於所以致名也。今進不能
建功。退不能高隱。又不肯失於放誕之名。行是。不能與
數子者。並惟著書以成其名耳。並響若漢書作者。以狀其
聲名之盛。文選及說文引之。並著作響漢書作者。以狀其
通也。說文。巴蜀名山。岸脅之。旁著欲落。攢者曰氏。氏
崩聲。聞數百里。而阜部又有低。曰秦謂陵阪。曰氏。然
則此字作氏音承。旨切。或作低。
音。丁禮切。皆本說文義。皆可通。

揚子雲解難 ○ ○

客難揚子曰。凡著書者。為衆人之所好也。美味期乎
 合口。工聲調於比耳。今吾子迺抗辭幽說。閱意眇指。

獨馳騁於有亡之際。而陶冶大鑪。旁薄羣生。歷覽者
茲年矣。而殊不寤。亶費精神於此。而煩學者於彼。譬
畫者畫於無形。弦者放於無聲。殆不可乎。揚子曰。俞。
若夫閔言崇議。幽微之塗。蓋難與覽者同也。昔人有
觀象於天。視度於地。察法於人者。天麗且彌。地普而
深。昔人之辭。迺玉迺金。彼豈好爲艱難哉。執不得已
也。獨不見夫翠虬絳螭之將登。虛天必聳身於蒼梧
之淵。不階浮雲。翼疾風。虛舉而上升。則不能搯膠葛。
騰九閔。日月之經。不千里。則不能燭六合。燿八紘。泰
山之高。不嶠嶢。則不能淖滄雲。而散敲烝。是曰宓犧
氏之作易也。縣絡天地。經八卦。文王附六爻。孔子
錯其象。而彖其辭。然後發天地之臧。定萬物之基。典
謨之篇。雅頌之聲。不溫純深潤。則不足曰揚鴻烈。而
章緝熙。蓋胥靡爲宰。寂寞爲尸。大味必淡。大音必希。

大語叫叫。大道低回。是巨聲之眇者。不可同於衆人之耳。形之美者。不可棍於世俗之目。辭之衍者。不可齊於庸人之聽。今夫弦者。高張急徽。追趨逐者。則坐者。不期而附矣。試爲之施咸池。掄六莖。發蕭韶。詠九成。則莫有和也。是故鍾期死。伯牙絕弦。破琴而不肯與衆鼓。饜人亡。則匠石輟斤。而不敢妄斲。師曠之調鍾。埃知音者之在後也。孔子作春秋。幾君子之前睹也。老聃有遺言。貴知我者希。此非其操與。

揚子雲反離騷

有周氏之蟬嫣兮。或鼻祖於汾隅。靈宗初謀。伯僑兮。流于末之楊侯。淑周楚之豐烈兮。超旣離虜皇波。因江潭而泄記兮。欽弔楚之湘纍。惟天軌之不辟兮。何純絜而離紛。紛纍纍。其澘忍兮。暗纍纍。其續紛。漢十世之陽朔兮。招搖紀于周正。正皇天之清則兮。度后

土之方貞。圖纍承彼洪族兮。又覽纍之昌辭。帶鉤矩而佩衡兮。履欒槍曰爲綦。纍初貯厥麗服兮。何文肆而質難。資嫵娃之珍髻兮。鬻九戎而索賴。鳳皇翔於蓬階兮。豈鴛鵝之能捷。騁驊騮曰曲難兮。驢騾連蹇而齊足。枳棘之榛榛兮。蝮豸擬而不敢下。靈修旣信椒蘭之啜佞兮。吾纍忽焉而不蚤睹。衿芟茄之綠衣兮。被夫容之朱裳。芳酷烈而莫聞兮。固不如裴而幽之。離房閨中容競淖約兮。相態以麗佳。知衆媮之嫉妒兮。何必颺纍之蛾眉。懿神龍之淵潛兮。埃慶雲而將舉。亡春風之被離兮。孰焉知龍之所處。愍吾纍之衆芬兮。颺暹暹之芳苓。遭季夏之凝霜兮。慶天頽而喪榮。橫江湘曰南淮兮。云走乎彼蒼梧。馳江潭之汎溢兮。將折衷虛重華。舒中情之煩或兮。恐重華之不纍。與陵陽侯之素波兮。豈吾纍之獨見。許精瓊靡與。

秋菊兮將已。延夫天年。臨汜羅而自隕兮。恐日薄於西山。解扶桑之總轡兮。縱令之遂奔馳。鸞皇騰而不屬兮。豈獨飛廉與雲師。卷薜芷與若蕙兮。臨湘淵而投之。棍申椒與菌桂兮。赴江湖而漚之。費椒楮已要神兮。又勤索彼瓊茅。違靈氛而不從兮。反湛身於江臯。纍旣狃夫傳說兮。奚不信而遂行。徒恐鸚鵡之將鳴兮。顧先百草爲不芳。初纍棄彼處妃兮。更思瑤臺之逸女。杼雄鳩已作媒兮。何百離而曾不壹耦。乘雲蜺之旖旎兮。望昆侖已膠流。覽四荒而顧懷兮。奚必云女彼高丘。旣亡鸞車之幽藹兮。焉駕八龍之委蛇。臨江瀕而掩涕兮。何有九招與九歌。夫聖哲之不遭兮。固時命之所有。雖增欷已於邑兮。吾恐靈修之不纍改。昔仲尼之去魯兮。萋萋遲遲而周邁。終回復於舊都兮。何必湘淵與濤瀨。溷漁父之鋪歎兮。絜沐浴

之振衣弃由聃之所珍兮蹠彭咸之所遺
望悽愴宗伯
所論最得子
雲用意深處

古文辭類纂六十八

古文精義卷之六十八

古文精義卷之六十八
一 古文之精者莫如周禮
二 周禮之精者莫如天官
三 天官之精者莫如甸人
四 甸人之職莫如辨九土之名
五 辨九土之名莫如辨十壤之法
六 辨十壤之法莫如辨十土之性
七 辨十土之性莫如辨十土之宜
八 辨十土之宜莫如辨十土之利
九 辨十土之利莫如辨十土之害
十 辨十土之害莫如辨十土之功

古文精義卷之六十八
一 古文之精者莫如周禮
二 周禮之精者莫如天官
三 天官之精者莫如甸人
四 甸人之職莫如辨九土之名
五 辨九土之名莫如辨十壤之法
六 辨十壤之法莫如辨十土之性
七 辨十土之性莫如辨十土之宜
八 辨十土之宜莫如辨十土之利
九 辨十土之利莫如辨十土之害
十 辨十土之害莫如辨十土之功

辭賦類八

古文辭類纂六十九

班孟堅兩都賦并序

伯父薑塢先生云凡所舉典於建國之規皆得其要瞻而

或曰賦者古詩之流也

班不穢詳而有體卽○

而

而詩不作大漢初定日不暇給至於武宣之世乃崇

禮官考文章內設金馬石渠之署外興樂府協律之

事以興廢繼絕潤色鴻業是以衆庶悅豫福應尤盛

白麟赤鴈芝房寶鼎之歌薦於郊廟神爵五鳳甘露

黃龍之瑞以為年紀故言語侍從之臣若司馬相如

虞邱壽王東方朔枚臯王褒劉向之屬朝夕論思日

月獻納而公卿大臣御史大夫倪寬太常孔臧大中

大夫董仲舒

按漢武帝前本有中大夫此是在省中

大也中大夫武帝後改為光祿大夫秩二千石

則董生為大大夫時其秩或中二千石或比二千石

僅千石反小於光祿大夫矣此必昭宣以後之制百

官表未詳言其升降但云秩千石則非公卿大臣而賈生自大中大夫為長沙傅亦何為降黜乎此實非舊制据孟堅此序足知表之漏闕矣又仲舒傳但云為中大夫不云為大中大夫亦是漏也 宗正

劉德太子太傅蕭望之等時時閒作或以抒下情而

通諷諭或以宣上德而盡忠孝雍容揄揚著於後嗣

抑亦雅頌之亞也故孝成之世論而錄之蓋奏御者

千有餘篇而後大漢之文章炳焉與三代同風且夫

道有夷隆學有麤密因時而建德者不以遠近易則

故臯陶歌虞奚斯頌魯同見采於孔氏列於詩書其

義一也稽之上古則如彼考之漢室又如此斯事雖

細然先臣之舊式國家之遺美不可缺也臣竊見海

內清平朝廷無事京師修宮室浚城隍起苑囿以備

制度西土耆老咸懷怨思冀上之睠顧而盛稱長安

舊制有陋洛邑之議故臣作兩都賦以極衆人之所

眩曜折以今之法度其辭曰

有西都賓問於東都主人曰。蓋聞皇漢之初經營也。嘗有意乎都河洛矣。輟而弗康。實用西遷。作我上都。主人聞其故而睹其制乎。主人曰。未也。願賓摠懷舊之蓄念。發思古之幽情。博我以皇道。弘我以漢京。賓曰。唯唯。漢之西都。在於雍州。實曰長安。左據函谷。二嶠之阻。表以太華。終南之山。右界褒斜。隴首之險。帶以洪河。涇渭之川。衆流之隈。汧涌其西。華實之毛。則九州之上腴焉。防禦之阻。則天地之隩區焉。是故橫被六合。三成帝畿。周以龍興。秦以虎視。及至大漢受命而都之也。仰悟東井之精。俯協河圖之靈。奉春建策。留侯演成。天人合應。以發皇明。乃眷西顧。實惟作京。於是睇秦嶺。瞰北阜。挾灃灊。據龍首。圖皇基於億載。度宏規而大起。肇自高而終平。世增飾以崇麗。歷十二之延祚。故窮泰而極侈。建金城之萬雉。呀周池。

而成淵。披三條之廣路。立十二之通門。內則街衢洞
達。閭閻且千。九市開場。貨別隧分。人不得顧。車不得
旋。闐城溢郭。旁流百塵。紅塵四合。煙雲相連。於是旣
庶且富。娛樂無疆。都人士女。殊異乎五方。遊士擬於
公侯。列肆侈於姬姜。鄉曲豪舉。游俠之雄。節慕原嘗。
名亞春陵。連交合衆。騁驚乎其中。若乃觀其四郊。浮
遊近縣。則南望杜霸。北眺五陵。名都對郭。邑居相承。
英俊之域。紱冕所興。冠蓋如雲。七相五公。與乎州郡
之豪傑。五都之貨殖。三選七遷。充奉陵邑。蓋以彊幹
弱枝。隆上都而觀萬國也。封畿之內。厥土千里。卓犖
諸夏。兼其所有。其陽則崇山隱天。幽林穹谷。陸海珍
藏。藍田美玉。商洛緣其隈。鄠杜濱其足。源泉灌注。陂
池交屬。竹林果園。芳草甘木。郊野之富。號爲近蜀。其
陰則冠以九峻。陪以甘泉。乃有靈宮。起乎其中。秦漢

之所極觀。淵雲之所頌歎。於是乎存焉。下有鄭白之沃。衣食之源。提封五萬。疆場綺分。溝塍刻鏤。原隰龍鱗。決渠降雨。荷插成雲。五穀垂穎。桑麻鋪棻。東郊則有通溝。大漕潰渭。洞河泛舟。山東控引。淮湖與海。通波。西郊則有上囿禁苑。林麓藪澤。陂池連乎蜀漢。繚以周牆。四百餘里。離宮別館。三十六所。神池靈沼。往往而在。其中乃有九真之麟。大宛之馬。黃支之犀。條枝之鳥。踰崑崙。越巨海。殊方異類。至於三萬里。其宮室也。體象乎天地。經緯乎陰陽。據坤靈之正位。倣太紫之圓方。樹中天之華闕。豐冠山之朱堂。因壤材而究奇。抗應龍之虹梁。列棼檠以布翼。荷棟桴而高驤。雕玉瑱以居楹。裁金璧以飾璫。發五色之渥彩。光耀朗以景彰。於是左城右平。重軒三階。闈房周通。門闥洞開。列鐘虞於中庭。立金人於端闈。仍增崖而衡闕。

臨峻路而啟扉。徇以離宮。別寢承以崇臺。閒館煥若
列宿。紫宮是環。清涼宣溫。神仙長年。金華玉堂。白虎
麒麟。區宇若茲。不可殫論。增盤崔嵬。登降炤爛。殊形
詭制。每各異觀。乘茵步輦。惟所息宴。後宮則有掖庭
椒房。后妃之室。合歡增城。安處常寧。莖若椒風。披香
發越。蘭林蕙草。鴛鸞飛翔之列。昭陽特盛。隆乎孝成。
屋不呈材。牆不露形。裛以藻繡。絡以綸連。隨侯明月。
錯落其閒。金釭銜璧。是爲列錢。翡翠火齊。流耀含英。
懸黎垂棘。夜光在焉。於是玄墀釵砌。玉階彤庭。硬碱
綵緻。琳璫青熒。珊瑚碧樹。周阿而生。紅羅颯纒。綺組
繽紛。精曜華燭。俯仰如神。後宮之號。十有四位。窈窕
繁華。更盛迭貴。處乎斯列者。蓋以百數。左右庭中朝
堂百僚之位。周時天子諸侯朝皆在廷不在堂。惟考
工記云外有九室九卿朝焉。此通言治
事之所曰朝耳。漢時議事亦在廷中。與古同。異於古
者皆坐而非立也。其朝堂蓋本爲大臣所次。止略如

古之九室前漢書內不見朝堂事如霍光傳議立帝

于中似議人少則在堂人多則在廷耶又在司徒府

推之西京賦云亦然耶此朝堂蓋亦南向在殿廷外偏

東故西京賦云朝堂承東非如後世朝房之制也而

班云左右廷中者自指百蕭曹魏邴謀謨乎其上也

命則垂統輔翼則成化流大漢之愷悌蕩亡秦之毒

螫故令斯人揚樂和之聲鼎按此用王襄令王褒作

引孔叢子功善也作畫一之歌功德著乎祖宗膏澤洽

乎黎庶又有天祿石渠典籍之府命夫惇誨故老名

儒師傅講論乎六藝稽合乎同異又有承明金馬著

作之庭大雅宏達於茲為羣元元本本殫見洽聞啟

發篇章校理祕文周以鈞陳之位衛以嚴更之署總

禮官之甲科羣百郡之廉孝鼎按此二句乃賦耶署

科為郎中故云總禮官之甲科也其廉孝一途則若
王吉京房俱以孝廉為郎是也耶選略盡於此二句
虎賁贅衣在漢則少府侍中之職闔尹闔寺陞戟百

重各有典司。周廬千列。

周鈞陳之位郎衛也。微道綺錯。

輦路經營。修除飛閣。自未央而連桂宮。北彌明光而

巨長樂。陵墜道而超西墉。棍建章而連外屬。設壁門

之鳳闕。上觚稜而棲金爵。內則別風嶠嶢。眇麗巧而

聳擢。張千門而立萬戶。順陰陽以開闔。爾乃正殿崔

嵬層構。厥高臨乎未央。經駘盪而出馭娑。洞朽詣

與天梁。上反宇以蓋戴。激日景而納光。神明鬱其特

起。遂偃蹇而上躋。軼雲雨於太半。虹霓迴帶於焚楹。

雖輕迅與僂狡。猶愕眙而不能階。攀井幹而未半。目

眩轉而意迷。捨櫺檻而卻倚。若顛墜而復稽。魂怳怳

以失度。巡迴塗而下。低旣懲懼於登望。降周流以傍

徨。步甬道以縈紆。又杳窅而不見。陽排飛闥而上出。

若遊目於天表。似無依而洋洋。前唐中而後太液。覽

滄海之湯湯。揚波濤於碣石。激神岳之蔣蔣。濫瀛洲

與方壺蓬萊起乎中央。於是靈草冬榮，神木叢生。巖峻嵒崿，金石崢嶸。抗仙掌以承露，擢雙立之金莖。軼埃盭之混濁，鮮顛氣之清英。騁文成之不誕，馳五利之所刑。庶松喬之羣類，時遊從乎斯庭。實列仙之攸館，非吾人之所寧。爾乃盛娛遊之壯觀，奮大武乎上囿。因茲以威戎夸狄，耀威靈而講武事。命荊州使起鳥，詔梁野而驅獸。毛羣內闐，飛羽上覆。接翼側足，集禁林而屯聚。水衡虞人，修其營表。種別羣分，部曲有署。罟網連絃，籠山絡野。列卒周匝，星羅雲布。於是乘鬪輿，備法駕。帥羣臣，披飛廉，入苑門，遂繞鄩鄩。歷上蘭，六師發逐，百獸駭殫。震震爚爚，雷奔電激。草木塗地，山淵反覆。蹂躪其十二三，乃拗怒而少息。爾乃期門飲飛，列刃鑽鏃。要趺追蹤，鳥驚觸絲。獸駭值鋒，機不虛掎。弦不再控，矢不單殺。中必疊雙，颯颯紛紛。增

繳相纏。風毛雨血。灑野蔽天。平原赤。勇士厲。援狄失
木。豺狼懾竄。爾乃移師趨險。並蹈潛穢。窮虎奔突。狂
兇觸蹶。許少施巧。秦成力折。猗僂狡。扼猛噬。脫角挫
脰。徒搏獨殺。挾師豹。拖熊螭。曳犀犛。頓象羆。超洞壑。
越峻崖。蹶嶄巖。巨石墮。松柏仆。叢林摧。草木無餘。禽
獸殄夷。於是天子乃登屬玉之館。歷長楊之榭。覽山
川之體勢。觀三軍之殺獲。原野蕭條。目極四裔。禽相
鎮壓。獸相枕藉。然後收禽會衆。論功賜胙。陳輕騎以
行。包騰酒車以斟酌。割鮮野食。舉燧命爵。饗賜畢。勞
逸齊。大輅鳴鑾。容與徘徊。集乎豫章之宇。臨乎昆明
之池。左牽牛。而右織女。似雲漢之無涯。茂樹蔭蔚。芳
草被隄。蘭茝發色。曄曄猗猗。若摛錦布。繡燭耀乎其
陂。玄鶴白鷺。黃鸝鷓鴣。鶻鷓鶻鷓。鳧鷖鴻雁。朝發河
海。夕宿江漢。沈浮往來。雲集霧散。於是後宮乘輦輅。

登龍舟。張鳳蓋。建華旗。祛黼帷。鏡清流。靡微風。澹淡
浮。擢女謳。鼓吹震。聲激越。警厲天。鳥羣翔。魚窺淵。招
白閒。下雙鷁。揄文竿。出比目。撫鴻壘。御矰繳。方舟並
鶩。俛仰極樂。遂乃風舉雲搖。浮遊溥覽。前乘秦嶺。後
越九嶷。東薄河華。西涉岐雍。宮館所歷。百有餘區。行
所朝夕。儲不改供。禮上下而接山川。究休祐之所用。
采遊童之權謠。第從臣之嘉頌。於斯之時。都都相望。
邑邑相屬。國藉十世之基。家承百年之業。士食舊德
之名。氏農服先疇之畝。故彙按王嘉傳倉氏庫氏則倉庫吏之後也商循
族世之所嚮。工用高曾之規。矩粲乎隱隱。各得其所。
若臣者。徒觀迹於舊墟。聞之乎故老。十分未得其一
端。故不能徧舉也。

東都主人喟然而歎曰。痛乎風俗之移人也。子實秦
人。矜夸館室。保界河山。信識昭襄而知始皇矣。烏覩

大漢之云爲乎。夫大漢之開元也。奮布衣以登皇位。由數期而創萬世。蓋六籍所不能談。前聖靡得而言焉。當此之時。功有橫而當天。計有逆而順民。故婁敬度勢而獻其說。蕭公權宜而拓其制。時豈泰而安之哉。計不得以已也。吾子曾不是睹。顧曜後嗣之未造。不亦暗乎。今將語子以建武之治。永平之事。監於太清。以變子之惑志。往者王莽作逆。漢祚中缺。天人致誅。六合相滅。於時之亂。生民幾亡。鬼神泯絕。壑無完柩。郭罔遺室。原野厭人之肉。川谷流人之血。秦項之災。猶不克半。書契以來。未之或紀。故下民號而上訴。上帝懷而降監。乃致命乎聖皇。於是聖皇乃握乾符。闡坤珍。披皇圖。稽帝文。赫然發憤。應若興雲。霆擊昆陽。憑怒雷震。遂超大河。跨北嶽。立號高邑。建都河洛。紹百王之荒屯。因造化之盪滌。體元立制。繼天而作。

系唐統。接漢緒。茂育羣生。恢復疆宇。勳兼乎在昔。事
勤乎三五。豈特方軌。跡紛綸。后辟治近古之所務。
蹈一聖之險。易云爾哉。且夫建武之元。天地革命。四
海之內。更造夫婦。肇有父子。君臣初建。人倫實始。斯
乃伏羲氏之所以基皇德也。分州土。立市朝。作舟輿。
造器械。斯乃軒轅氏之所以開帝功也。龔行天罰。應
天順民。斯乃湯武之所以昭王業也。遷都改邑。有殷
宗中興之則焉。卽土之中。有周成隆平之制焉。不階
尺土。一人之柄。同符乎高祖。克己復禮。以奉終始。允
恭乎孝文。憲章稽古。封岱勒成。儀炳乎世宗。按六經
而校德。眇古昔而論功。仁聖之事。旣該。而帝王之道
備矣。至於永平之際。重熙而累洽。盛三雍。三雍字見後漢書趙
熹傳之上儀。修袞龍之法服。鋪鴻藻。信景鑠。揚世廟。正
予樂。人神之和。允洽。羣臣之序。旣肅。乃動大輅。遵皇

衢省方巡狩窮覽萬國之有無考聲教之所被散皇
明以燭幽然後增周舊修洛邑扇巍巍顯翼翼光漢
京於諸夏總八方而爲之極於是皇城之內宮室光
明闕庭神麗奢不可踰儉不能侈外則因原野以作
苑順流泉而爲沼發蘋藻以潛魚豐圃草以毓獸制
同乎梁鄒誼合乎靈囿若乃順時節而蒐狩簡車徒
以講武則必臨之以王制考之以風雅歷騶虞覽駟
臧嘉車攻采吉日禮官整儀乘輿乃出於是發鯨魚
鏗華鐘登玉輅乘時龍鳳蓋苓麗龢鑿玲瓏天官景
從寢威盛容山靈護野屬御方神雨師汎灑風伯清
塵千乘雷起萬騎紛紜元戎竟野戈鋌彗雲羽旄掃
霓旌旗拂天焱焱炎炎揚光飛文吐爛生風欲野歎
山日月爲之奪明邱陵爲之搖震遂集乎中囿陳師
按屯駢部曲列校隊勒三軍誓將帥然後舉烽伐鼓

申令三驅。輜車霆激。驍騎電驚。由基發射。范氏施御。弦不蹶禽。轡不詭遇。飛者未及翔。走者未及去。指顧倏忽。獲車已實。樂不極盤。殺不盡物。馬踠餘足。士怒未泄。先驅復路。屬車案節。於是薦三犧。效五牲。禮神祇。懷百靈。覲明堂。臨辟雍。揚緝熙。宣皇風。登靈臺。考休徵。俯仰乎乾坤。參象乎聖躬。日中夏而布德。瞰四裔而抗棱。西盪河源。東澹海濬。北動幽崖。南耀朱垠。殊方別區。界絕而不鄰。自孝武之所不征。孝宣之所未臣。莫不陸贛水慄。奔走而來賓。遂綏哀牢。開永昌。春王三朝。會同漢京。是日也。天子受四海之圖籍。膺萬國之貢珍。內撫諸夏。外綏百蠻。爾乃盛禮興樂。供帳置乎雲龍之庭。陳百寮而贊羣后。究皇儀而展帝容。於是庭實千品。旨酒萬鍾。列金罍。班玉觴。嘉珍御。太牢饗。爾乃食舉雍徹。太師奏樂。陳金石。布絲竹。鐘

鼓鏗銅管。弦擘煜煜。抗五聲。極六律。歌九功。舞八佾。韶武備。泰古畢。四夷聞奏。德廣所及。僣侏兜離。罔不具集。萬樂備。百禮暨。皇歡浹。羣臣醉。降烟燭。調元氣。然後撞鐘告罷。百寮遂退。於是聖上覩萬方之歡娛。又沐浴於膏澤。懼其侈心之將萌。而怠於東作也。乃申舊章。下明詔。命有司。班憲度。昭節儉。示太素。去後宮之麗飾。損乘輿之服御。抑工商之淫業。興農桑之盛務。遂令海內棄末而反本。背僞而歸真。女修織紵。男務耕耘。器用陶匏。服尚素玄。恥纖靡而不服。賤奇麗而不珍。捐金於山。沈珠於淵。於是百姓滌瑕盪穢。而鏡至清。形神寂漠。耳目不營。嗜欲之源滅。廉恥之心生。莫不優游而自得。玉潤而金聲。是以四海之內。學校如林。庠序盈門。獻酬交錯。俎豆莘莘。下舞上歌。蹈德詠仁。登降飫宴之禮既畢。因相與嗟歎。立德謹言。

弘說咸含和而吐氣頌曰盛哉乎斯世今論者但知
誦虞夏之書詠殷周之詩講義文之易論孔氏之春
秋罕能精古今之清濁究漢德之所由唯子頗識舊
典又徒馳騁乎末流溫故知新已難而知德者鮮矣
且夫僻界西戎險阻四塞修其防禦孰與處乎土中
平夷洞達萬方輻湊秦嶺九峻涇渭之川曷若四瀆
五嶽帶河沂洛圖書之淵建章甘泉館御列仙孰與
靈臺明堂統和天人太液昆明鳥獸之園曷若辟雍
海流道德之富游俠踰侈犯義侵禮孰與同履法度
翼翼濟濟也子徒習秦阿房之造天而不知京洛之
有制也識函谷之可關而不知王者之無外也主人
之辭未終西都賓矍然失容逡巡降階慄然意下捧
手欲辭主人曰復位今將授子以五篇之詩賓既卒
業乃稱曰美哉乎斯詩義正乎揚雄事實乎相如匪

唯主人之好學。蓋乃遭遇乎斯時也。小子狂簡。不知所裁。既聞正道。請終身而誦之。其詩曰。

於昭明堂。明堂孔陽。聖皇宗祀。穆穆煌煌。上帝宴饗。五位時序。誰其配之。世祖光武。普天率土。各以其職。猗與緝熙。允懷多福。

乃流辟雍。辟雍湯湯。聖皇莅止。造舟爲梁。皤皤國老。乃父乃兄。抑抑威儀。孝友光明。於赫太上。示我漢行。洪化惟神。永觀厥成。

乃經靈臺。靈臺既崇。帝勤時登。爰考休徵。三光宣精。五行布序。習習祥風。祁祁甘雨。百穀蓁蓁。庶草蕃庶。屢惟豐年。於皇樂胥。

嶽修貢兮川效珍。吐金景兮歛浮雲。寶鼎見兮色紛。緼煥其炳兮被龍文。登祖廟兮享聖神。昭靈德兮彌億年。

啓靈篇兮披瑞圖。獲白雉兮效素烏。嘉祥阜兮集皇都。發皓羽兮奮翹英。容潔朗兮於淳精。彰皇德兮侔周成。永延長兮膺天慶。

傅武仲舞賦。○○

楚襄王旣游雲夢。使宋玉賦高唐之事。將置酒宴飲。謂宋玉曰。寡人欲觴羣臣。何以娛之。玉曰。臣聞歌以詠言。舞以盡意。是以論其詩。不如聽其聲。聽其聲。不如察其形。激楚結風。陽阿之舞。材人之窮觀。天下之至妙。噫。可以進乎。王曰。其如鄭何。玉曰。小大殊用。鄭雅異宜。弛張之度。聖哲所施。是以樂記千戚之容。雅美蹲蹲之舞。禮設三爵之制。頌有醉歸之歌。夫咸池六英。所以陳清廟。協神人也。鄭衛之樂。所以娛密坐。接歡欣也。餘日怡蕩。非以風民也。其何害哉。王曰。試爲寡人賦之。玉曰。唯唯。夫何皎皎之閒夜兮。明月爛

以施光。朱火擘其延起兮。耀華屋而燻洞房。黼帳祛而結組兮。鋪首炳以焜煌。陳茵席而設坐兮。溢金罍而列玉觴。騰觚爵之斟酌兮。漫旣醉其樂康。嚴顏和而怡懌兮。幽情形而外揚。文人不能懷其藻兮。武毅不能隱其剛。簡情跳躑般紛拏兮。淵塞沈蕩改恆常兮。於是鄭女出進。二八徐侍。姣服極麗。姁媮致態。貌嫵妙以妖蠱兮。紅顏擘其揚華。眉連娟以增繞兮。目流睇而橫波。珠翠的皪而炤耀兮。華袿飛髻而雜纖羅。顧形影自整裝。順微風揮若芳。動朱脣紆清揚。亢音高歌爲樂之方。歌曰。據予意以弘觀兮。繹精靈之所束。弛緊急之弦張兮。慢末事之委曲。舒恢哀之廣度兮。闊細體之苛縟。嘉關雎之不淫兮。哀蟋蟀之局促。啓泰貞之否隔兮。超遺物而度俗。揚激徵騁清角。贊舞操奏均曲。形態和神意協。從容得志不劫。於是

躡節鼓陳舒意自廣游心無垠遠恩長想其始興也
若俯若仰若來若往雍容惆悵不可爲象其少進也
若翽若行若竦若傾兀動赴度指顧應聲羅衣從風
長袖交橫駱驛飛散颯攜合并鷗鷗燕居拉搯鷦鷯
綽約閒靡機迅體輕姿絕倫之妙態懷慤素之潔清
修儀操以顯志兮獨馳思乎杳冥在山峨峨在水湯
湯與志遷化容不虛生明詩表指噴息激昂氣若浮
雲志若秋霜觀者增歎諸工莫當於是合場遞進案
次而俟埒材角妙夸容乃理軼態橫出瑰姿譎起眇
般鼓則騰清眸吐哇咬則發皓齒摘齊行列經營切
儼彷彿神動迴翔竦峙擊不致策蹈不頓趾翼爾悠
往闔復輟已及至迴身還入迫於急節浮騰累跪跗
躡摩跌紆形赴遠灌似摧折纖縠蛾飛紛焮若絕超
逾鳥集縱弛殞歿倭蛇媢媢雲轉飄忽體如游龍袖

如素蛻矐眈而拜曲度究畢遷延微笑退復次列觀者稱麗莫不怡悅於是歡洽宴夜命遣諸客擾攘就駕僕夫正策車騎竝狎龍從逼迫良駿逸足踰捍凌越龍驤橫舉揚鑣飛沫馬材不同各相傾奪或有踰埃赴轍霆駭電滅蹠地遠羣闐跳獨絕或有宛足鬱怒般桓不發後往先至遂為逐末或有矜容愛儀洋洋習習遲速承意控御緩急車音若雷驚驟相及駱漠而歸雲散城邑天王燕胥樂而不溢娛神遺老永年之術優哉游哉聊以永日

古文辭類纂六十九

辭賦類九

張平子二京賦○○○

古文辭類纂七十

有憑虛公子者。心麥體快。雅好博古。學乎舊史氏。是以多識前代之載。言於安處先生曰。夫人在陽時則舒。在陰時則慘。此牽乎天者也。處沃土則逸。處瘠土則勞。此繫乎地者也。慘則勉於歡。勞則褊於惠。能違之者寡矣。小必有之。大亦宜然。故帝者因天地以致化。兆民承上教以成俗。化俗之本。有與推移。何以覈諸。秦據雍而強。周卽豫而弱。高祖都西而泰。光武處東而約。政之興衰。恆由此作。先生獨不見西京之事。與請爲吾子陳之。漢氏初都。在渭之涘。秦里其朔。實爲咸陽。左有嶠函。重險桃林之塞。綴以二華。巨靈轟肩。高掌遠蹠。以流河曲。厥跡猶存。右有隴坻之隘。隔閔華戎。岐梁汧雍。陳寶鳴雞在焉。於前則終南太一。

隆崛崔峯。隱麟鬱律。連岡乎蟠冢。抱社含鄠。欲灑吐
鎬。爰有藍田珍玉。是之自出。於後則高陵平原。據渭
踞涇。瀟漫靡迤。作鎮於近。其遠則有九峻甘泉。涸陰
沍寒。日北至而含凍。此焉清暑。爾乃廣衍沃野。厥田
上上。實爲地之奧區。神臯昔者。大帝悅秦繆公而覲
之。饗以鈞天樂。帝有醉焉。乃爲金策。錫用此土。而
翦諸鶉首。是時也。竝爲彊國者有六。然而四海同宅。
西秦豈不詭哉。自我高祖之始入也。五緯相汁。以旅
於東井。婁敬委輅。幹非其議。天啓其心。人蒸之謀。及
帝圖時。意亦有慮乎神祇。宜其可定。以爲天邑。豈伊
不虔思於天衢。豈伊不懷歸於枌榆。天命不滔。疇敢
以渝。於是量徑輪。考廣袤。經城洫。營郭郛。取殊裁於
八都。豈稽度於往舊。爾乃覽秦制。跨周法。狹百堵之
側陋。增九筵之迫脅。正紫宮於未央。表曉闕於闔闔。

疏龍首以抗殿。狀巍峩以岌業。巨雄虹之長梁。結焚

燎以相接。蒂倒茄於藻井。披紅葩之狎獵。飾華棖與

壁璫。流景曜之鞞擘。雕楹玉碣。繡栢雲楣。三階重軒。

鏤檻文楹。右平左城。青瑣丹墀。刊層平堂。設砌厓隰。

坻崿鱗眴。眴胡切棧齮嶢嶮。襄岸夷塗。修路陵險。重門

襲固。姦宄是防。仰福帝居。陽曜陰藏。洪鐘萬鈞。猛虜

橫。橫負筍業。而餘怒乃奮。翅而騰。驤朝堂承東。溫調

延北。西有玉臺。聯以昆德。嵯峨嶮嶮。罔識所則。若夫

長年神仙。宣室玉堂。麒麟朱鳥。龍興含章。譬衆星之

環極。叛赫戲以輝煌。正殿路寢。用朝羣辟。大夏耽耽。

霽按路寢謂長樂宮正殿其殿名大夏董卓傳九戶

注引三輔舊事云漢置銅人長樂宮大夏殿前開闢嘉木樹庭芳草如積高門有闕列坐金狄內有

常侍謁者。常侍與謁者皆士人息夫躬傳有中常侍

宋弘董賢傳有中常侍王閔薛綜注謂闈官誤矣闈官中常侍後漢之制耳謁者後漢選孝廉

爲之前漢無定制其寺人之謁者若高后紀中謁者

張釋卿是也。然灌嬰亦名中。謁者則士人為常侍。奉謁者並可加中字。顏監謂加中字為闕亦非也。

命當御。外有蘭臺金馬。遞宿迭居。次有天祿石渠校

文之處。重以虎威章溝嚴更之署。徼道外周。千廬內

附。衛尉八屯。警夜巡晝。植鍛懸殿。用戒不虞。後宮則

昭陽飛翔。增成合驩。蘭林披香。鳳凰鴛鸞。羣窈窕之

華麗。嗟內顧之所觀。故其館室次舍。采飾纖縟。裏以

藻繡。文以朱綠。翡翠火齊。絡以美玉。流懸黎之夜光。

綴隨珠以為燭。金卮玉階。彤庭輝輝。珊瑚琳碧。璠珉

璘彬。珍物羅生。煥若崑崙。雖厥裁之不廣。侈靡踰乎

至尊。於是鉤陳之外。閣道穹隆。屬長樂與明光。徑北

通乎桂宮。命般爾之巧匠。盡變態乎其中。於是後宮

不移。樂不徒懸。門衛供帳。官以物辨。恣意所幸。下輦

成燕。窮年忘歸。猶弗能徧。瑰異日新。殫所未見。以上賦城

內宮殿以下賦城外離宮獨舉惟帝王之神麗懼尊甘泉建章者以帝常居此也

卑之不殊。雖斯宇之既坦，心猶憑而未據。思比象於紫微，恨阿房之不可廬。覩往昔之遺館，獲林光於秦餘。處甘泉之爽塏，乃隆崇而弘敷。既新作於迎風，增露寒與儲胥。託喬基於山岡，直躡霓以高居。通天諒以竦峙，徑百常而莖擢。上辨華以交紛，下刻隋其若削。翔鸞仰而不逮，沉青鳥與黃雀。伏櫺檻而頰聽，聞雷霆之相激。柏梁旣災，越巫陳方。建章是經，用厭火祥。營宇之制，事兼未央。圓闕竦以造天，若雙碣之相望。鳳鸞翥於豐標，咸颯風而欲翔。閭闔之內，別風嶢嶢。何工巧之瑰瑋，交綺豁以疏寮。干雲霧而上達，狀亭亭以峇峇。神明崛其特起，井幹疊而百增。峙遊極於浮柱，結重欒以相承。累層構而遂躋，望北辰而高興。消雰埃於中宸，集重陽之清徵。瞰宛虹之長鬢，察雲師之所憑。上飛闥而仰眺，正覩瑤光與玉繩。將乍

往而未半。怵悼慄而聳兢。非都盧之輕趨。孰能超而
究升。馭娑駘盪。燾稟桔桀。杓詣承光。睽眾摩豁。增桴
重焚。鏐鏐列列。反宇業業。飛檐轆轤。流景內照。引曜
日月。天梁之宮。實開高闈。旗不脫扃。結駟方靳。櫟輻
輕驚。容於一扉。長廊廣廡。連閣雲蔓。閉庭詭異。門千
戶萬。重閨幽闥。轉相逾延。望窻窳以徑廷。眇不知其
所返。既乃珍臺蹇產。以極壯。登道邈倚。以正東。似閭
風之遐坂。橫西洫而絕金墉。城尉不弛。柝而內外。潛
通。前開唐中。彌望廣豫。顧臨太液。滄池潏沔。漸臺立
於中央。赫阡阡。阡乎古切以弘敞。清淵洋洋。神山峩峩。列
瀛洲與方丈。夾蓬萊而駢羅。上林岑以壘巖。下蘄巖
以壘巖。長風激於別隲。起洪濤而揚波。浸石菌於重
涯。濯靈芝。以朱柯。海若遊於玄渚。鯨魚失流。而蹉跎
於是。采少君之端信。庶纒大之貞固。立修莖之仙掌。

承雲表之清。露屑瓊藥。以朝餐。必性命之可度。美往昔之松喬。要羨門乎天路。想升龍於鼎湖。豈時俗之足慕。若歷世而長存。何遽營乎陵墓。徒觀其城郭之制。以下城市風俗則旁開三門。參塗夷庭。方軌十二。街衢相經。塵里端直。藿宇齊平。北闕甲第。當道直啓。程巧致功。期不陁陔。木衣緹錦。土被朱紫。武庫禁兵。設在蘭鏡。匪石匪董。疇能宅此。爾乃廓開九市。通闔帶闐。旗亭五重。俯察百隧。周制大胥。今也惟尉。瓌貨方至。鳥集鱗萃。鬻者兼贏。求者不匱。爾乃商賈百族。裨販夫婦。鬻良雜苦。蚩眩邊鄙。何必昏於作勞。邪羸優而足恃。彼肆人之男女。麗美奢乎許史。若夫翁伯濁質。張里之家。擊鐘鼎食。連騎相過。東京公侯。壯何能加。都邑游俠。張趙之倫。齊志無忌。擬跡田文。輕死重氣。結黨連羣。實蕃有徒。其從如雲。茂陵之原。陽陵之朱。譙

悍虓豁如虎如狸。眈眈薑芥。屍僵路隅。丞相欲以贖
子罪。陽石汙而公孫誅。若其五縣遊麗。辯論之士。街
談巷議。彈射臧否。剖析毫釐。擘肌分理。所好生毛羽。
所惡成創痍。郊甸之內。鄉邑殷賑。五都貨殖。既遷既
引。商旅聯福。隱隱展展。冠帶交錯。方輿接軫。封畿千
里。統以京尹。郡國宮館。以下補敘諸離宮苑囿百四十五。右極

蓋屋。并卷鄴鄂。左暨河華。遂至號土。善注右扶風有號縣非是此當

引地志宏農郡陝縣故號國左傳東盡號略是也上林禁苑。跨谷彌阜。東至

鼎湖。斜界細柳。掩長楊而聯五柞。繞黃山而款牛首。
繚垣縣聯。四百餘里。植物斯生。動物斯止。衆鳥翩翩。
羣獸駉駉。散似驚波。聚似京峙。伯益不能名。隸首不
能紀。林麓之饒。於何不有。木則縱括。椶楠。梓。楸。楸。楓。
嘉卉灌叢。蔚若鄧林。鬱蒼蔓葍。櫛爽櫛慘。吐葩颺榮。
布葉垂陰。草則葳莎。菅蒯。薇蕨。荔荒。王芻。茵臺。戎葵。

懷羊。芣苢蓬茸。彌臯被岡。篠簜敷衍。編町成篁。山谷
原隰。泱泱無疆。迺有昆明。靈沼黑水。玄趾周以金隄。
樹以柳杞。豫章珍館。揭焉中峙。牽牛立其左。織女處
其右。日月於是乎出入。象扶桑與濛汜。其中則有鼉
鼉巨鼈。鱣鯉鱖鮪。鮪鮠鱧鯊。修額短項。大口折鼻。詭
類殊種。鳥則鸛鷓。鴟鵂鴞鴝。鴛鴦鴻鸚。上春候來。季秋就
溫。南翔衡陽。北棲鴈門。奮隼歸鳧。沸卉駟訃。衆形殊
聲。不可勝論。於是孟冬作陰。以下田獵寒風肅殺。雨雪飄
飄。冰霜慘烈。百卉具零。剛蟲搏摯。爾乃振天維。衍地
絡。蕩川瀆。簸林薄。鳥畢駭。獸咸作。草伏木棲。寓居穴
託。起彼集此。霍繹紛泊。在彼靈囿之中。前後無有垠
鈎。虞人掌焉。爲之營域。焚萊平場。柞木翦棘。結罝百
里。迄杜蹊塞。麋鹿麇麇。駢田偪仄。天子乃駕彫軫。六
駿駮。戴翠帽。倚金較。璿弁玉纓。薛注弁馬冠也。霽按馬冠自名鈹耳。左傳

言玉自為瓊弁玉纓賦正用此遺光儵爚建玄弋樹

招搖何義門改弋為盾天鋒晉杓云外遠北斗也

名玄戈然玄弋又見棲鳴鳶曳雲梢弧旌枉矢虹旂

蜺旄華蓋承辰天畢前驅千乘雷動萬騎龍趨屬車

之篋載獫狁獯匪惟玩好迺有祕書小說九百本自

虞初從容之求實俟實儲於是蚩尤秉鉞奮鬣被般

禁禦不若以知神姦魑魅魍魎莫能逢旗鼎按此六句謂旄頭

陳虎旅於飛廉正壘壁乎上蘭結部曲整行伍燎京

薪馘雷鼓縱獵徒赴長莽冽卒清候武士赫怒緹衣

靺鞨睢盱拔扈光炎燭天庭囂聲振海浦河渭為之

波盪吳嶽為之阨堵百禽悽遽駸瞿奔觸喪精亡魂

失歸忘趨投輪關輻不邀自遇飛罕瀟飈流鏑擣暴

矢不虛舍鈇不苟躍當足見蹉值輪被轆僵禽斃獸

爛若磧礫但觀罝羅之所緝結竿及之所捏蹙又族

爛若磧礫但觀罝羅之所緝結竿及之所捏蹙又族

之所攙掩。徒搏之所撞。白晝未及移其晷。已獮其什七八。若夫遊鷲高翬。絕阮踰斥。毳兔聯猿。陵巒超壑。比諸東郭。莫之能獲。乃有迅羽輕足。尋景追括。鳥不暇舉。獸不得發。青駮摯於韝下。韓盧噬於綵末。及其猛毅鬚鬣。隅目高眦。威懾兕虎。莫之敢伉。乃使中黃之士。育獲之儔。朱鬣鬣。植髮如竿。袒裼戟手。奎踞盤桓。鼻赤象。圈巨挺。擅拂狷。批獺。按枳落。突棘藩。梗林爲之靡拉。樸叢爲之摧殘。輕銳僞狡。趨捷之徒。赴洞穴。探封狐。陵重巘。獵昆駮。杪木末。獲蘄湖。超殊榛。帶飛颺。是時後宮嬖人。昭儀之倫。常亞於乘輿。慕賈氏之如臯。樂北風之同車。盤于遊畋。其樂只且。於是鳥獸殫。目觀窮。遷延邪睨。集乎長楊之宮。息行夫。展車馬。收禽舉。數課衆寡。置互擺牲。頒賜獲鹵。割鮮野饗。犒勤賞功。三軍六師。千列百重。酒車酌醴。

方駕授饗。升觴舉燧。既醕鳴鐘。膳夫馳騎。察貳廉空。

炙魚夥。清醑敘。皇恩溥。洪德施。徒御悅。士志罷。巾車

命駕。迴旆右移。以下水嬉相羊乎五柞之館。旋憩乎昆明

之池。登豫章。簡矐紅。蒲且發。弋高鴻。挂白鶴。聯飛龍。

磻不特絃。往必加雙。於是命舟牧。為水嬉。浮鷁首。翳

雲芝。垂翟葆。建羽旗。齊棹女。縱櫂歌。發引和。校鳴葭。

奏淮南。度陽阿。感河馮。懷湘娥。驚蜩蝻。憚蛟蛇。然後

釣魴鱧。纏鯁鮪。撫紫貝。搏耆龜。搯水豹。馱潛牛。澤虞

是濫。何有春秋。擿滲澥。搜川瀆。布九罟。設罝罝。撰鯤

鰔。殄水族。藻藕拔。蜃蛤剝。逞欲畋斂。效獲麇麋。摻蓼

泮浪。乾池滌藪。上無逸飛。下無遺走。獲胎拾卵。蚺蜃

盡取。取樂今日。遑恤我後。既定且寧。焉知傾陔。以下陳百

戲大駕幸乎平樂。張甲乙而襲翠被。攢珍寶之玩好。

紛瑰麗以奢靡。臨迴望之廣場。程角觝之妙戲。烏獲

扛鼎都盧尋撞衝狹鷲濯胸突銛鋒跳丸劍之揮霍
走索上而相逢華嶽峩峩岡巒參差神木靈草朱實
離離總會仙倡戲豹舞羆白虎鼓瑟蒼龍吹篴女娥
坐而長歌聲清暢而蛟蛇洪涯立而指麾被毛羽之
馘灑度曲未終雲起雪飛初若飄飄後遂霏霏複陸
重閣轉石成雷霹礚激而增響磅磳象乎天威巨獸
百尋是爲曼延神山崔巍歛從背見熊虎升而拏攫
援狄超而高援怪獸陸梁大爵跋跋白象行孕垂鼻
麟困海鱗變而成龍狀蜿蜿以蝨蝨舍利颺颺化爲
仙車驪駕四鹿芝蓋九葩蟾蜍與龜水人弄蛇奇幻
儵忽易貌分形吞刀吐火雲霧杳冥畫地成川流涓
通涇東海黃公赤刀粵祝冀厭白虎卒不能救挾邪
作蠱於是不售爾乃建戲車樹修旗偃僮逞材上下
翩翩突倒投而跟絰譬殞絕而復聯百馬同轡騁足

竝馳。撞末之伎。態不可彌。彎弓射乎西羌。又顧發乎

鮮卑。於是衆變盡。心醒醉。以下燕遊聲色盤樂極。悵懷萃。陰

戒期門。微行要屈。降尊就卑。懷璽藏紱。便旋閨闈。周

觀郊遂。若神龍之變化。彰后皇之爲貴。然後歷掖庭。

適歡館。捐衰色。從嬿婉。促中堂之陋坐。羽觴行而無

算。祕舞更奏。妙材騁伎。妖蠱豔夫。夏姬美聲。暢於虞

氏。始徐進而羸形。似不任乎羅綺。嚼清商而卻轉。增

嬋娟。以躡豸。紛縱體而迅赴。若驚鶴之羣。羆振朱屣。

於盤樽。奮長袖之颯。纏要紹修態。麗服颺菁。昭藐流

眄。一顧傾城。展季桑門。誰能不營。列爵十四。競媚取

榮。盛衰無常。惟愛所丁。衛后興於鬢髮。飛燕寵於體

輕。爾乃逞志究欲。窮歡極娛。鑒戒唐詩。他人是媮。自

君作故。何禮之拘。增昭儀於婕妤。好賢旣公。而又侯許。

趙氏以無上思致。董於有虞。王閔爭於坐側。漢載安。

而不渝。高祖創業。繼體承基。暫勞永逸。無爲而治。耽樂是從。何慮何思。多歷年所。二百餘期。徒以地沃野豐。百物殷阜。巖險周固。襟帶易守。得之者強。據之者久。流長則難竭。柢深則難朽。故奢泰肆情。馨烈彌茂。鄙生生乎三百之外。傳聞於未聞之者。曾髣髴其若夢。未一隅之能覩。此何異於殷人屢遷。前八而後五。居相圯耿。不常厥土。盤庚作誥。帥人以苦。方今聖上同天號於帝皇。掩四海而爲家。富有之業。莫我大也。徒恨不能以靡麗爲國華。獨儉嗇以齷齪。忘蟋蟀之謂何。豈欲之而不能。將能之而不欲。與蒙竊惑焉。願聞所以辯之之說也。安處先生於是似不能言者。憮然有閱。乃莞爾而笑曰。若客所謂末學膚受。貴耳而賤目者也。苟有胸而無心。不能節之以禮。宜其陋今而榮古矣。由余以西戎孤臣。而悝繆公於宮室。如之

何其以溫故知新。研覈是非。近於此惑也。周姬之末。不能厥政。政用多僻。始於宮鄰。卒於金虎。嬴氏搏翼。擇肉西邑。是時也。七雄並爭。競相高以奢麗。楚築章華於前。趙建叢臺於後。秦政利觜長距。終得擅場。思專其侈。以莫己若。乃構阿房。起甘泉。結雲閣。冠南山。徵稅盡。人力殫。然後收以太半之賦。威以參夷之刑。其遇民也。若薙氏之芟草。旣蘊崇之。又行火焉。慄慄黔首。豈徒踣高天。踏厚地而已哉。乃救死於其頸。斃以就役。惟力是視。百姓不能忍。是用息肩於大漢。欣戴高祖。高祖膺籙受圖。順天行誅。杖朱旗而建大號。圖所推必亡。所存必固。掃項軍於垓下。繼子嬰於軹塗。因秦宮室。據其府庫。作洛之制。我則未暇。是以西匠營宮。目翫阿房。規摹踰溢。不度不臧。損之又損。然尚過於周堂。觀者狹而謂之陋。帝已譏其泰而弗康。

且高既受命建家。造我區夏矣。文又躬自菲薄。治致升平之德。武有大啓土宇。紀禪肅然之功。宣重威以

撫和戎狄。呼韓來享。咸用紀宗存主。

西漢本以高帝爲太祖文帝爲

太宗武帝爲世宗及光武建武十九年又尊宣帝曰中宗故並曰紀宗存主

饗祀不輟銘

勳彝器。歷世彌光。今舍純懿而論爽德。以春秋所諱而爲美談。宜無嫌於往初。故蔽善而揚惡。祇吾子之不知言也。必以肆奢爲賢。則是黃帝合宮。有虞總期。固不如夏癸之瑤臺。殷辛之瓊室也。湯武誰革而用師哉。盍亦觀東京之事。以自寤乎。且夫天子有道。守在海外。守位以仁。不恃隘害。苟民志之不諒。何云巖險與襟帶。秦負阻於二關。卒開項而受沛。彼偏據而規小。豈如宅中而圖大。昔先王之經邑也。掩觀九隩。靡地不營。土圭測景。不縮不盈。總風雨之所交。然後以建王城。審曲面勢。泝洛背河。左伊右瀍。西阻九阿。

東門于旋。盟津達其後。太谷通其前。迴行道乎伊闕。邪徑捷乎轘轅。太室作鎮。揭以熊耳。底柱輟流。鐔以大岬。温液湯泉。黑丹石緇。王鮪岫居。能鼈三趾。處妃攸館。神用挺紀。龍圖授羲。龜書畀姒。召伯相宅。卜惟洛食。周公初基。其繩則直。萇弘魏舒。是廓是極。經途九軌。城隅九雉。度堂以筵。度室以几。京邑翼翼。四方所視。漢初弗之宅。故宗緒中圯。巨猾閭豐。竊弄神器。歷載三六。偷安天位。于時蒸民。罔敢或貳。其取威也重矣。我世祖忿之。乃龍飛白水。鳳翔參墟。授鉞四七。共工是除。櫬槍旬始。羣凶靡餘。區宇乂寧。思和求中。睿哲玄覽。都茲洛宮。曰止曰時。昭明有融。既光厥武。仁洽道豐。登岱勒封。與黃比崇。逮至顯宗。六合殷昌。

乃新崇德。遂作德陽。崇德殿在南宮見蔡邕傳注光武時本有故曰新德陽殿在北

宮見靈紀明帝始立故曰作南宮相距三里薛綜注乃云崇德宮在東德陽宮在西北相去五十步殆是

也。誤啓南端之特闈。立應門之將將。昭仁惠於崇賢。抗

義聲於金商。飛雲龍於春路。屯神虎於秋方。建象魏

之兩觀。旌六典之舊章。其內則含德章臺。天祿宣明。

溫飭迎春。壽安永寧。飛閣神行。莫我能形。濯龍芳林。

續漢志濯龍園名近北宮善注謂池名按池固名濯龍然賦乃指謂園九谷八溪。芙蓉

覆水。秋蘭被涯。渚戲躍魚。淵游龜螭。永安離宮。續漢志永安

安北宮東北別小宮名有園觀修竹冬青。陰池幽流。玄泉冽清。鸞鷟

秋棲。鷓鴣春鳴。鳴鳩麗黃。關關嚶嚶。於南則前殿雲

臺。蘇籬安福。諛門曲榭。邪阻城洫。奇樹珍果。鈎盾所

職。西登少華。亭候修勅。九龍之內。實曰嘉德。西南其

戶。匪雕匪刻。我后好約。乃宴斯息。於東則洪池。洪池後漢

書紀傳作鴻池清籟以下皆洛陽城外淶水澹澹。內阜川禽。外豐葭

茨。獻鼈蜃與龜魚。供蝸廡與菱芡。其西則有平樂都

場。示遠之觀。龍雀蟠蜿。天馬半漢。瑰異譎詭。燦爛炳

煥奢未及侈。儉而不陋。規遵王度。動中得趣。於是觀

禮。禮舉儀具。經始勿亟。成之不日。猶謂爲之者勞。居

之者逸。慕唐虞之茅茨。思夏后之卑室。乃營三宮。布

教頌常。三宮皆在平城門外。平城門洛陽南門也。複廟重屋。八達九房。規

天矩地。授時順鄉。造舟清池。惟水泱泱。左制辟雍。右

立靈臺。因進距衰。表賢簡能。馮相觀祲。祈禳禳災。於

是孟春元日。羣后旁戾。百僚師師。于斯胥泊。藩國奉

聘。要荒來質。具惟帝臣。獻琛執贄。當覲乎殿下者。蓋

數萬以二。爾乃九賓重。臚人列。崇牙張。鏞鼓設。郎將

司階。虎戟交。鍛龍輅充庭。雲旗拂霓。夏正三朝。庭燎

哲哲。撞洪鐘。伐靈鼓。旁震八鄙。軒轅隱旬。若疾霆轉

雷而激迅風也。是時稱警蹕已。下雕輦於東廂。霽按天子

下輦於東廂前者乃謁陵禮若朝則叔孫通傳固云輦出房也此廂字必房字之誤而薛李注皆未辯之

冠通天。佩玉璽。紆皇組。要于將。負斧辰。次席紛純。左

右玉几而南面以聽矣。然後百辟乃入。司儀辨等。尊卑以班。璧羔皮帛之贄既奠。天子乃以三揖之禮禮之。穆穆焉。皇皇焉。濟濟焉。將將焉。信天下之壯觀也。乃羨公侯卿士。登自東除。訪萬幾。詢朝政。勤恤民隱。而除其眚。人或不得其所。若己納之於隍。荷天下之重任。匪怠皇以寧靜。

肅意作甯靜。怠皇則於韻協。

發京倉散禁財。

賚皇僚。逮輿臺。命膳夫以大饗。饗餼浹乎家陪。春醴惟醇。燔炙芬芬。君臣歡康。具醉熏熏。千品萬官。已事而竣。勤屢省。懋乾乾。清風協於玄德。淳化通於自然。憲先靈而齊軌。必三思以顧愆。招有道於側陋。開敢諫之直言。聘邱園之耿絜。旅束帛之戔戔。上下通情。式宴且盤。及將祀天郊。報地功。祈福乎上玄。思所以爲虔。肅肅之儀盡。穆穆之禮殫。然後以獻精誠。奉禋祀。曰允矣。天子也。乃整法服。正冕帶。珩紘絃紆。玉笄

綦會。火龍黼黻。藻繅擊厲。結飛雲之袷輅。樹翠羽之

高蓋。建辰旒之太常。紛焱悠以容裔。六玄蚪之奕奕。

齊騰驤而沛艾。龍輶華轡。金鈹鏤錫。方鈇方鈇薛注語不分明

劉昭注輿服志引蔡邕獨斷云鐵廣數寸在馬驥後後有三孔插翟尾其中又許慎說文云乘輿馬頭上

防鈇插以翟尾鐵翻象角所以防網羅鈇去之鼎按蔡許二說合其制乃明而獨斷馬驥後之後字蓋前

字或上字之誤所云翟尾蓋以鐵為其形耳賦內方字宜讀作防左燾。鈎膺玉瓊。鑿

聲噦噦。和鈴缺缺。重輪貳轄。疏轂飛軫。羽蓋葳蕤。葩

瑤曲莖。順時服而設副。咸龍旂而繁纓。立戈迤戛。農

輿輅木。屬車九九。乘軒並轂。寧弩重旗。朱旄青屋。奉

引既畢。先輅乃發。鸞旗皮軒。通帛績旆。雲罕九旂。闐

戟鞞鞞。聳髦被繡。虎夫戴鶡。駙承華之蒲梢。飛流蘇

之騷殺。總輕武於後陳。奏嚴鼓之嘈囂。戎士介而揚

揮。戴金鉦而建黃鉞。清道案列。天行星陳。肅肅習習。

隱隱麟麟。殿未出乎城闕。旆已迴乎郊畛。盛夏后之

致美。爰恭敬於明神。爾乃孤竹之管。雲和之瑟。雷鼓
鼗。六變旣畢。冠華秉翟。列舞八佾。元祀惟稱。羣望
咸秩。颺標燎之炎煬。致高煙乎太一。神歆馨而顧德。
祚靈主以元吉。然後宗上帝於明堂。推光武以作配。
辨方位而正則。五精帥而來摧。尊赤氏之朱光。四靈
懋而允懷。於是春秋改節。四時迭代。蒸蒸之心。感物
增思。躬追養於廟祧。奉蒸嘗與禴祠。物牲辯省。設其
楅衡。毛魚豚胎。亦有和羹。滌濯靜嘉。禮儀孔明。萬舞
奕奕。鐘鼓喤喤。靈祖皇考。來顧來饗。神具醉止。降福
穰穰。及至農祥。晨正土膏。脈起乘鑿。輅而駕蒼龍。介
馭閒以剡耜。躬三推於天田。修帝籍之千畝。供禘郊
之粢盛。必致思乎勤己。北民勸於疆場。感懋力以耘
耔。春日載陽。合射辟雍。設業設虞。宮懸金鑪。鼗鼓路
鼗。樹羽幢幢。於是備物。物有其容。伯夷起而相儀。后

夔坐而爲工。張大侯制五正。設三乏。扉司旌。并夾旣

設。儲乎廣庭。於是皇輿夙駕。輦於東階以須。說文輦連車也

一曰卸車消啓明。掃朝霞。登天光於扶桑。天子乃撫

玉輅。時乘六龍。發鯨魚。鏗華鐘。大丙弭節。風后陪乘。

攝提運衡。徐至於射宮。禮事展。樂物具。王夏闋。騶虞

奏。決拾旣次。彫弓斯設。達餘萌於暮春。昭誠心以遠

喻。進明德而崇業。滌饕餮之貪欲。仁風衍而外流。誼

方激而遐驚。日月會於龍躔。恤民事之勞疚。因休力

以息勤。致歡忻於春酒。執鑿刀以袒割。奉觴豆於國

叟。降至尊以訓恭。送迎拜乎三壽。敬慎威儀。示民不

偷。我有嘉賓。其樂愉愉。聲教布濩。盈溢天區。文德旣

昭。武節是宣。三農之隙。曜威中原。歲惟仲冬。大閱西

園。虞人掌焉。先期戒事。悉率百禽。鳩諸靈囿。獸之所

同。是惟告備。乃御小戎。撫輕軒。中改四牡。旣信且閑。

戈矛若林。牙旗繽紛。迄于上林。結徒爲營。次和樹表。
司鐸授鉦。坐作進退。節以軍聲。三令五申。示戮斬牲。
陳師鞠旅。教達禁成。火烈具舉。武士星敷。鵝鸛魚麗。
箕張翼舒。軌塵掩沆。匪疾匪徐。馭不詭遇。射不翦毛。
升獻六禽。時膳四膏。馬足未極。輿徒不勞。成禮三驅。
解罟放麟。不窮樂以訓儉。不殫物以昭仁。慕天乙之
弛罟。因教祝以懷民。儀姬伯之渭陽。失熊羆而獲人。
澤浸昆蟲。威振八寓。好樂無荒。允文允武。薄狩于敖。
旣瑣瑣焉。岐陽之蒐。又何足數。爾乃卒歲大讎。毆除
羣癘。方相秉鉞。巫覡操劔。侏子萬童。丹首玄製。桃弧
棘矢。所發無臬。飛礮雨散。剛瘳必斃。煌火馳而星流。
逐赤疫於四裔。然後凌天池。絕飛梁。捐魑魅。斬橘狂。
斬蛟蛇。腦方良。囚耕父於清泠。溺女魃於神潢。殘夔
魑於罔像。殪野仲而殲游光。八靈爲之震懼。況魑蜮

與畢方。度朔作梗。守以鬱壘。神荼副焉。對操索葦。目
察區陬。司執遺鬼。京室密清。罔有不逮。於是陰陽交
和。庶物時育。卜征考祥。終然允淑。乘輿巡乎岱嶽。勸
稼稽於原陸。同衡律而壹軌量。齊急舒於寒燠。省幽
明以黜陟。乃反旆而迴復。望先帝之舊墟。慨長思而
懷古。俟閭風而西遐。致恭祀乎高祖。既春遊以發生。
啓諸蟄於潛戶。度秋豫以收成。觀豐年之多稔。嘉田
畷之匪懈。行致賚于九扈。左瞰暘谷。右睨玄圃。眇天
末以遠期。規萬世而大摹。且歸來以釋勞。膺多福以
安念。總集瑞命。備致嘉祥。圍林氏之騶虞。擾澤馬與
騰黃。鳴女牀之鸞鳥。舞丹穴之鳳皇。植華平於春圃。
豐朱草於中唐。惠風廣被。澤洎幽荒。北燮丁令。南諧
越裳。西包大秦。東過樂浪。重舌之人。九譯僉稽首而
來王。是故論其遷邑易京。則同規乎殷盤。改奢卽儉。

則合美乎斯干。登封降禪。則齊德乎黃軒。爲無爲事。無事。永有民以孔安。遵節儉。尚素樸。思仲尼之克己。履老氏之常足。將使心不亂其所在。目不見其可欲。賤犀象。簡珠玉。藏金於山。抵璧於谷。翡翠不裂。璚瑁不族。所貴惟賢。所寶惟穀。民去末而反本。咸懷忠而抱慤。于斯之時。海內同悅。曰。吁。漢帝之德。侯其禕而蓋。莫莢爲難。時也。故曠世而不覲。惟我后能殖之。以至和平。方將數諸朝階。然則道胡不懷。化胡不柔。聲與風翔。澤從雲游。萬物我賴。亦又何求。德寓天覆。輝烈光燭。狹三王之趨。越軼五帝之長驅。踵二皇之遐武。誰謂駕遲而不能屬。東京之懿未罄。值余有犬馬之疾。不能究其精詳。故粗爲賓言。其梗槩如此。若乃流遯忘反。放心不覺。樂而無節。後離其戚。一言幾於喪國。我未之學也。且夫挈瓶之智。守不假器。況纂帝

業而輕天位。瞻仰二祖。厥庸孔肆。常翹翹以危懼。若
 乘奔而無轡。白龍魚服。見困豫且。雖萬乘之無懼。猶
 怵惕於一夫。終日不離其輜重。獨微行其焉如。夫君
 人者。黈纆塞耳。車中不內顧。珮以制容。鑿以節塗。行
 不變玉。駕不亂步。卻走馬以糞車。何惜騶裊與飛兔。
 方其用財取物。常畏生類之殄也。賦政任役。常畏人
 力之盡也。取之以道。用之以時。山無槎枿。畋不麋胎。
 草木蕃廡。鳥獸阜滋。民忘其勞。樂輸其財。百姓同於
 饒衍。上下共其雍熙。洪恩素蓄。民心固結。執義顧主。
 夫懷貞節。此應首忿姦慝之干命。怨皇統之見替。玄
 謀設而陰行。合二九而成謫。登聖皇於天階。章漢祚
 之有秩。若此。故王業可樂焉。今公子苟好勦民。以媮
 樂。此應首忘民怨之為仇也。好殫物以窮寵。忽下叛
 而生憂也。夫水所以載舟。亦所以覆舟。堅冰作於履

霜尋木起於蘖栽。昧日不顯。後世猶怠。況初制於甚
泰。服者焉能改裁。故相如壯上林之觀。揚雄騁羽獵
之辭。雖系以頽牆填壑。亂以收置解罟。卒無補於風
規。祇以昭其愆尤。臣濟夤以陵君。忘經國之長基。故
函谷擊柝於東西。朝顛覆而莫持。鼎按西朝顛覆指
王莽篡弒之事薛
注失凡人心是所學。體安所習。鮑肆不知其臭。翫其
所以先入。咸池不齊度於鼃咬。而衆聽或疑。能不惑
者。其惟子野乎。客旣醉於大道。飽於文義。勸德畏戒。
喜懼交爭。罔然若醒。朝罷夕倦。奪氣褫魄之爲者。忘
其所以爲談。失其所以爲夸。良久乃言曰。鄙哉子乎。
習非而遂迷也。幸見指南於吾子。若僕所聞。華而不
實。先生之言。信而有徵。鄙夫寡識。而今而後。迺知大
漢之德馨。咸在於此。昔常恨三墳五典旣泯。仰不覩
炎帝帝魁之美。得聞先生之餘論。則大庭氏何以尚

茲走雖不敏庶斯達矣

竊按西京雄麗欲掩孟堅東京則氣不足舉其辭不若東

都之簡當惟末章
諷戒擊切處為勝

張平子思玄賦 ○

仰先哲之玄訓兮。雖彌高而弗違。匪仁里其焉宅兮。
匪義迹其焉追。潛服膺以永靖兮。縣日月而不衰。伊
中情之信修兮。慕古人之貞節。竦余身而順止兮。遵
繩墨而不跌。志搏搏以應懸兮。誠心固其如結。旌性
行以製佩兮。佩夜光與瓊枝。繡幽蘭之秋華兮。又綴
之以江蘼。美襞積以酷烈兮。允塵邈而難虧。旣姱麗
而鮮雙兮。非是時之攸珍。奮余榮而莫見兮。播余香
而莫聞。幽獨守此仄陋兮。敢怠皇而舍勤。幸二八之
選虞兮。嘉傳說之生殷。尚前良之遺風兮。恫後辰而
無及。何孤行之熒熒兮。予不羣而介立。感鸞鷲之特
棲兮。悲淑人之希合。彼無合而何傷兮。患衆偽之冒

真日獲讎于羣弟兮。啓金滕而後信。覽蒸民之多僻兮。畏立辟以危身。增煩毒以迷惑兮。羌孰可爲言己。私湛憂而深懷兮。思續紛而不理。願竭力以守誼兮。雖貧窮而不改。執彫虎而試象兮。阼焦原而跟趾。庶斯奉以周旋兮。要旣死而後已。俗遷渝而事化兮。泯規矩之員方。寶蕭艾於重笥兮。謂薰莩之不香。斥西施而弗御兮。繫騶裊以服箱。行頗僻而獲志兮。循法度而離殃。惟天地之無窮兮。何遭遇之無常。不抑操而苟容兮。譬臨河而無航。欲巧笑以干媚兮。非余心之所嘗。襲溫恭之黻衣兮。被禮義之繡裳。辨貞亮以爲鞏兮。雜伎藝以爲珩。昭綵藻與瑀瑑兮。璜聲遠而彌長。淹棲遲以恣欲兮。耀靈忽其西藏。恃己知而華予兮。鷓鴣鳴而不芳。冀一年之二秀兮。道白露之爲霜。時亶亶而代序兮。疇可與乎比伉。咨如燂之難竝

兮。想依韓以流亡。恐漸冉而無成兮。留則蔽而不彰。
心猶豫而狐疑兮。卽岐阻而臚情。文君爲我端著兮。
利飛遯以保名。歷衆山以周流兮。翼迅風以揚聲。二
女感於崇嶽兮。或冰拆而不營。天蓋高而爲澤兮。誰
云路之不平。勵自強而不息兮。蹈玉階之嶢崢。懼筮
氏之長短兮。鑽東龜以觀禎。遇九臯之介鳥兮。怨素
意之不逞。遊塵外而瞥天兮。據冥翳而哀鳴。鵬鷲競
於貪婪兮。我修絜以益榮。子有故於玄鳥兮。歸母氏
而後寧。占旣吉而無悔兮。簡元辰而倣裝。日余沐於
清源兮。以下東方晞余髮於朝陽。漱飛泉之瀝液兮。咀石
菌之流英。黜烏舉而魚躍兮。將往走乎八荒。過少皞
之窮野兮。問二邱于句芒。何道真之淳粹兮。去穢累
而飄輕。登蓬萊而容與兮。鼇雖抃而不傾。留瀛洲而
采芝兮。聊且以乎長生。憑歸雲而遐逝兮。夕余宿乎

扶桑飲青岑之玉醴兮。餐沆瀣以爲糧。發昔夢於木
禾兮。穀崑崙之高岡。朝吾行於暘谷兮。從伯禹乎稽
山。嘉羣神之執玉兮。疾防風之食言。指長沙之邪徑
兮。存重華乎南鄰。以下南方哀二妃之未從兮。翩續處彼
湘濱。流目眺夫衡阿兮。覩有黎之圯墳。痛火正之無
懷兮。託山陂以孤魂。愁鬱鬱以慕遠兮。越邛州而遊
遨。躋日中於昆吾兮。憩炎火之所陶。揚芒熛而絳天
兮。水沄沄而涌濤。溫風翕其增熱兮。怒鬱悒其難聊。
顛羈旅而無友兮。余安能乎留茲。以下西方顧金天而歎
息兮。吾欲往乎西嬉。前祝融使舉麾兮。纒朱鳥以承
旗。躡建木於廣都兮。撫若華而躊躇。超軒轅於西海
兮。跨汪氏之龍魚。聞此國之千歲兮。曾焉足以娛余。
思九土之殊風兮。從蓐收而遂徂。歛神化而蟬蛻兮。
朋精粹而爲徒。蹶白門而東馳兮。云台行乎中野。以下

中亂弱水之潺湲兮。逗華陰之湍渚。號馮夷俾清津兮。擢龍舟以濟予。會帝軒之未歸兮。悵徜徉而延佇。泗河林之蓊蓊兮。偉闕雎之戒女。黃靈詹而訪命兮。穆天道其焉如。曰近信而遠疑兮。六籍闕而不書。神達昧其難覆兮。疇克謀而從諸。牛哀病而成虎兮。雖逢昆其必噬。鼈令瘞而尸亡兮。取蜀禪而引世。死生錯其不齊兮。雖司命其不瞞。竇號行於代路兮。後膺祚而繁廡。王肆侈於漢庭兮。卒銜恤而絕緒。尉厖眉而郎潛兮。逮三葉而邁武。董弱冠而司袞兮。設王隧而弗處。夫吉凶之相仍兮。恆反仄而靡所。穆屈天以悅牛兮。豎亂叔而幽主。文斷袪而忌伯兮。闔謁賊而寧后。通人闇於好惡兮。豈昏惑而能剖。嬴擿讖而戒胡兮。備諸外而發內。或輦賄而違車兮。孕行產而爲對。慎竈顯以言天兮。占水火而妄訊。梁叟患夫黎邱

兮。丁厥子而剗刃。親所睨而弗識兮。矧幽冥之可信。
毋繇攀以滓己兮。思百憂以自疹。彼天監之孔明兮。
用斐忱而祐仁。湯蠲體以禱祈兮。蒙扈禡以拯民。景
三慮以營國兮。熒惑次於他辰。魏顆亮以從治兮。鬼
亢回以斃秦。咎繇邁而種德兮。樹德懋于英六。桑末
寄夫根生兮。卉旣凋而已育。有無言而不酬兮。又何
往而不復。盍遠迹以飛聲兮。孰謂時之可蓄。仰矯首
以遙望兮。魂慙惘而無傳。逼區中之隘陋兮。以下將
北度而宣遊。行積冰之磴磴兮。清泉沍而不流。寒風
淒其永至兮。拂穹岫之騷騷。玄武縮於殼中兮。騰蛇
蜿而自糾。魚矜鱗而并凌兮。鳥登木而失條。坐太陰
之屏室兮。慨含欷而增愁。怨高陽之相寓兮。岫顛頊
而宅幽。庸織路於四裔兮。斯與彼其何瘳。望寒門之
絕垠兮。縱余緜乎不周。以下入地迅焱瀟其騰我兮。鶩翩

飄而不禁。越谿爛之洞穴兮。漂通川之琳琳。經重唐
乎寂寞兮。愍墳羊之深潛。追荒忽於地底兮。軼無形
而上浮。出石密之閭野兮。不識蹊之所由。仙居速燭
龍令執炬兮。過鍾山而中休。瞰瑤谿之赤岸兮。弔祖
江之見劉。聘王母於銀臺兮。羞玉芝以療飢。戴勝憇
其旣歡兮。又謂余之行遲。載太華之玉女兮。召洛浦
之宓妃。咸姣麗以蠱媚兮。增嫫眼而蛾眉。舒紗婧之
纖腰兮。揚雜錯之桂徽。離朱脣而微笑兮。顏的礫以
遺光。獻環琨與琛縞兮。申厥好以玄黃。雖色豔而賂
美兮。志浩蕩而不嘉。雙材悲於不納兮。竝詠詩而清
歌。歌曰。天地烟煜。百竈含葩。鳴鶴交頸。睢鳩相和。處
子懷春。精魂回移。如何淑明。忘我實多。將答賦而不
暇兮。爰整駕而亟行。瞻崑崙之巍巍兮。臨滎河之洋
洋。伏靈龜以負坻兮。巨螭龍之飛梁。登閩風之層城。

兮。搆不死而爲牀。屑瓊藥以爲糝兮。劑白水以爲漿。
抨巫咸以占夢兮。乃貞吉之元符。滋令德於正中兮。
含嘉秀以爲敷。旣垂穎而顧本兮。亦要思乎故居。安
和靜而隨時兮。姑純懿之所廬。戒庶僚以夙會兮。僉
供職而並迓。豐隆軒其震霆兮。以下列缺曄其照夜。
雲師黶以交集兮。凍雨沛其灑塗。轆璣輿而樹葩兮。
擾應龍以服輅。百神森其備從兮。屯騎羅而星布。振
余袂而就車兮。修劍揭以低昂。冠岳岳其映蓋兮。佩
綖纚以輝煌。僕夫儼其正策兮。八乘騰而超驥。氛旄
溶以天旋兮。蜺旌飄以飛揚。撫軫軼而還睨兮。心勺
灑其若湯。羨上都之赫戲兮。何迷故而不忘。左青瑤
以捷芝兮。右素威以司鉦。前長離使拂羽兮。委水衡
乎玄冥。屬箕伯以函風兮。激洪烈而爲清。曳雲旗之
離離兮。鳴玉鸞之譽譽。涉清霄而升遐兮。浮蟻蠓而

上征。紛翼翼以徐戾兮。焱回回其揚靈。叫帝閭使闢
扉兮。覲天皇於瓊宮。聆廣樂之九奏兮。展洩洩以彤
彤。考治亂於律均兮。意建始而思終。惟般逸之無斁
兮。懼樂往而哀來。素女撫絃而餘音兮。太容吟曰念
哉。旣防溢而靖志兮。迨我暇以翱翔。出紫宮之肅肅
兮。集太微之閶闔。命王良掌策駟兮。踰高閣之將將。
建罔車之幕幕兮。獵青林之芒芒。彎威弧之拔刺兮。
射幡冢之封狼。觀壁壘於北落兮。伐河鼓之磅礴。乘
天潢之汎汎兮。浮雲漢之湯湯。倚招搖攝提以低徊
剡流兮。察二紀五緯之綢繆。適皇。偃蹇夭矯婉以連
卷兮。雜沓叢頓颯以方驤。鹹汨颺淚沛以罔象兮。爛
漫麗靡藐以迭盪。凌驚雷之硤盛兮。弄狂電之淫裔。
踰麗鴻於宕冥兮。貫倒景而高厲。廓盪盪其無涯兮。
乃今窺乎天外。據開陽而頽眊兮。臨舊鄉之暗藹。悲

離居之勞心兮。情悄悄而思歸。魂眷眷而屢顧兮。馬
倚軒而徘徊。雖遊娛以媮樂兮。豈愁慕之可懷。出閭
闔兮降天途。乘焱忽兮馳虛無。雲菲菲兮繞余輪。風
眇眇兮震余旟。續連翩兮紛暗曖。儵眩眩兮反常閭。
收疇昔之逸豫兮。卷淫放之遐心。修初服之娑娑兮。
長余佩之參參。文章奐以燦爛兮。美紛紜以從風。御
六藝之珍駕兮。遊道德之平林。結典籍而爲畧兮。毆
儒墨而爲禽。玩陰陽之變化兮。詠雅頌之徽音。嘉曾
氏之歸耕兮。慕歷阪之欽崱。恭夙夜而不貳兮。固終
始之所服。夕惕若厲以省讐兮。懼余身之未救。苟中
情之端直兮。莫吾知而不忍。默無爲以凝志兮。與仁
義乎逍遙。不出戶而知天下兮。何必歷遠以劬勞。系
曰。天長地久歲不留。俟河之清祗懷憂。願得遠度以
自娛。上下無常窮六區。超踰騰躍絕世俗。飄遙神舉

逞所欲。天不可階。仙夫稀。柏舟悄悄。吝不飛。松喬高
時孰能離。結精遠遊。使心攜。迴志竭來。從玄謨。獲我
所求。夫何思。

古文辭類纂七十列。文苑英華。風交而不復。合。固於
謝文。謝直。合。莫。吾。於。而。不。或。燭。無。餘。以。幾。志。合。與。才
故。文。行。顯。文。謝。若。愚。以。合。體。合。點。合。史。文。未。應。青。中
古文辭類纂七十列。文苑英華。風交而不復。合。固於

謝文而。謝直。合。莫。吾。於。而。不。或。燭。無。餘。以。幾。志。合。與。才
故。文。行。顯。文。謝。若。愚。以。合。體。合。點。合。史。文。未。應。青。中

謝文而。謝直。合。莫。吾。於。而。不。或。燭。無。餘。以。幾。志。合。與。才
故。文。行。顯。文。謝。若。愚。以。合。體。合。點。合。史。文。未。應。青。中

謝文而。謝直。合。莫。吾。於。而。不。或。燭。無。餘。以。幾。志。合。與。才
故。文。行。顯。文。謝。若。愚。以。合。體。合。點。合。史。文。未。應。青。中

謝文而。謝直。合。莫。吾。於。而。不。或。燭。無。餘。以。幾。志。合。與。才
故。文。行。顯。文。謝。若。愚。以。合。體。合。點。合。史。文。未。應。青。中